

全上古三代秦漢三國六朝文

全齊文目錄

高帝 卷一至卷二

武帝 卷三至卷五

鬱林王

海陵王

明帝

東昏侯

和帝 已上卷五

文安王后

豫章王嶷

江夏王鋒

始安王遙光

文惠太子長懋 已上卷六

竟陵王子良

魚復侯子響

隨郡王子隆 已上卷七

蕭景先

蕭緬

蕭穎胄

王琨

王遠之

王珪之

王顥

王僧虔

王慈 已上卷八

王儉 卷九至卷十一

王奐

王融

王秀之

王晏

王思遠 已上卷十二至卷十三

褚淵

張沖

明僧紹

檀超

沈淵

沈沖

沈憲

李安民

謝超宗 已上卷十四

張融

王玄載

江謐

陸澄

顧測 已上卷十五

祖仲之 卷十六

柳世隆

王巨源

袁彖

垣崇祖

劉休

劉俊

劉綸 已上卷十七

庾玩之

劉暉

劉進

劉善明

呂安國

裴昭明

劉祥

已上卷十八

孔稚珪

何昌寓

已上卷十九

徐孝嗣

周顒

王琰

劉蚪

已上卷二十

曹虎

虞棕

胡諧之

周山文

裴叔業

崔慧景

崔覺

崔偃

崔祖思

崔元祖

主彬 已上卷二十一

顧歡

宗淵

陳文建

一作文孝建

任遐

張欣泰

司馬憲

熊襄

孔顗

蔡履

已上卷二十二

謝朓

卷二十三

王祐

劉蔓

蔡仲熊

紀德真

孔琇之

庾杲之

殷淵

何謹之

桑惠度

顧嵩之

王摛

陸厥

綦母珍之

李塢

已上卷二十四

王植

王儼之

杜元懿

荀平一作荀平

崔慰祖

巨雄

謝靈濟

江祀

虞炎

虞羲

陶韶

徐景嵩

庾弘遠

謝赫已上卷二十五

關名

敕奏議符移銘

外國

百濟國王

芮芮相

扶南國王

釋氏

那伽仙

釋玄暢

釋智林

釋道盛

釋弘光

釋慧琳

竺法真

釋僧嚴

釋玄光

釋氏闕名

僊道

孟景翼

已上卷二十六

大凡全齊文二十六卷一百三十一人

謹按梅氏齊文紀有蕭日南者蕭曷之誤梁書曷作景避諱改今編入全梁文

全齊文卷一

烏程嚴可均校輯

高帝一

帝姓蕭諱道成字紹伯小名鬪將南蘭陵武進人元嘉末爲左  
軍中兵參軍襲父承之爵晉興縣男孝武卽位歷大司馬參軍  
太宰員外郎直閣中書舍人撫軍參軍建康令北軍中郎中兵  
參軍丁母憂起爲武烈將軍復爲建康令景和中除後軍將軍  
泰始初爲右軍將軍加輔國將軍除驍騎將軍封西陽縣侯遷  
衛軍司馬除征北司馬南東海太守行南徐州事假冠軍將軍  
遷南兖州刺史入拜散騎常侍太子左衛率泰豫末爲右衛將  
軍領衛尉元徽中加侍中平南將軍尚書左僕射尋弒蒼梧王  
迎立順帝進侍中司空錄尚書事驃騎大將軍封竟陵郡公假  
黃鉞進太尉都督南徐等十六州諸軍事進都督中外諸軍事



太傅領揚州牧昇明三年三月進相國總百揆封齊公加九錫  
四月進爵爲王受禪改元建元在位四年諡曰高皇帝廟號太  
祖

卽位改元大赦詔

建元元年四月

五德更紹帝迹所以代昌三正迭隆王度所以改耀世有質文時  
或因革其資元膺祿經道振民固以異術同揆殊流共貫者矣朕  
以寡昧屬值艱季推肆勤之誠藉樂治之數賢能悉心士民致力  
用獲拯溺龔臯一匡天下業未參古功殆俾昔宋氏以陵夷有徵  
祿數攸及思弘樂推永鑒崇替爰集天祿於朕躬惟志菲薄辭弗  
獲昭遂欽從天人式繇景命祗月正於文祖升禋鬯於上帝猥以  
寡德光宅四海纂革代之蹤託王公之上若涉淵水罔知所濟寶  
祚初啟洪慶惟新思俾利澤宣被億兆可赦天下改昇明三年爲  
建元元年賜人爵二級文武進位二等餽寡孤獨不能自存者穀

人五斛。逋租宿債勿復收。有犯鄉論清議。贓汙淫盜。一皆蕩滌。洗除先注。與之更始。長徒敕繫之囚。特皆原遣。亡官失爵。禁錮奪勞。一依舊典。

南齊書高帝紀下

降封宋世公侯詔

繼世象賢。列代盛典。疇庸嗣美。前載令圖。宋氏通侯。乃宜隨運。省替。但欽德懷義。尚表墳閭。況功濟區夏。道光民俗者哉。降差之典。宜遵往制。南康縣公華容縣公。可爲侯。萍鄉縣侯。可爲伯。減戶自差。以繼劉穆之王弘。何無忌後。

南齊書高帝紀下

慶宥詔

宸運肇創。寶命惟新。宜弘慶宥。廣敷蠲沐。劫賊餘口。沒在臺府者。悉原赦。諸負釁流徙。普聽還本土。

南齊書高帝紀下

下二宮諸王詔

自廬井毀制。農桑易業。鹽鐵妨民。貨幣傷治。歷代成俗。流弊歲滋。

援拯遺弊革未反本使公不專利氓無失業二宮諸王悉不得營

立屯邸封略山湖太官池鰲宮停稅入優量省置南齊書高帝紀下

宋世有功者仍本封詔建元元年五月

宸運革命引爵改封宋氏第秩雖宜省替其有預効屯夷宣力齊

業者一仍本封無所減降南齊書高帝紀下

斷眾募詔

設募取將懸賞購士蓋出權宜非曰恆制頃世艱險浸以成俗且

長逋逸閑罪山湖是爲黥刑不辱亡竄無咎自今以後可斷眾募

南齊書高帝紀下

郵枯骸毀櫬詔建元元年六月

宋末頻年戎寇兼災疾凋損或枯骸不收毀櫬莫掩宜速宣下埋

藏營郵若標題猶存姓字可識可卽運載致還本鄉南齊書高帝紀下

宣撫交州詔建元元年七月

交趾比景獨隔書朔斯乃前運方季負海不朝因迷遂往歸款莫由曲赦交州部內李叔獻一人卽撫南土文武詳才選用並遣大使宣揚朝恩

南齊書高帝紀下

甄敘遺才詔

建元元年十月

朕嬰綴世務三十餘歲險阻艱難備嘗之矣末路屯夷戎車歲駕誠藉時來之運實資士民之力宋元徽二年以來諸從軍得官者未悉蒙祿可催速下訪隨正卽給才堪餘任者訪洗量序若四州士庶本鄉淪陷簿籍不存尋校無所可聽州郡保押從實除奏荒遠關中正者特許據軍簿奏除或戍扞邊役末由旋反聽於同軍各立五保所隸有司時爲言列

南齊書高帝紀下

詔報夏侯恭叔

與運隆替自古有之朝議已定不容復厝意也

南齊書劉峻傳太祖受禪平西記室

參軍夏侯恭叔上書以柳元景中興功臣劉劭弒身王事宜存封爵詔云云

與褚淵手詔

建元元年

向見世隆毀瘠過甚殆欲不可復識非直使人惻然實亦世珍國

寶也

南齊書柳世隆傳

答陳顯達詔

建元元年

朝廷爵人以序卿忠發萬里信誓如期雖屠城殄國之勲無以相  
加此而不賞典章何在若必未宜爾吾終不妄授於卿數示意同  
家人豈止於君臣邪過明與王李俱祇召也

南齊書陳顯達傳

手詔賜張融衣

見卿衣服麤故誠乃素懷有本交爾藍縷亦虧朝望今送一通故  
衣意謂雖故乃勝新也是吾所著已令裁減稱卿之體竝履一量

南齊書張融傳

原王遜詔

建元初

儉門世載德竭誠佐命特降刑書宥遜

南齊書王儉傳儉弟遜建元初為晉陵太守有怨言

中丞陸澄依  
南齊書下詔

以豫章王嶷為荆湘二州刺史詔建元元年

神牧總司王畿誠為治要荆楚領馭遐遠任寄弘隆自頃公私凋

盡緩撫之宜尤重恆日復以為都督荆湘雍益梁益南北秦八州

諸軍事南蠻校尉荆湘二州刺史持節侍中將軍開府如故南齊書豫

章王

疑傳  
下陸澄詔建元元年

澄表據多謬不足深劾可白衣領職南齊書陸澄傳

授加羅國王荷知詔建元元年

量廣始登遠夷治化加羅王荷知款關海外奉贄東還可授輔國

將軍本國王南齊書東南夷傳

詔答河南王拾寅建元元年

皇帝敬問使持節散騎常侍都督西秦河沙三州諸軍事車騎大

將軍開府儀同三司領護羌校尉西秦河二州刺史新除驃騎大將軍河南王贊命革授爰集朕躬猥當大業祇惕兼懷夏中增感王世武至得元徽五年五月二十一日表聞之溼熱想比平安又卿款誠遙著保寧遐邇今詔升徽號以酬忠款遣王世武銜命拜授又仍使王世武等往苻苻想卽資遣使得時達又奏所上馬等物悉至今往別牒錦絳紫碧綠黃青等紋各十四南齊書河南氏羌傳按河南卽吐谷渾

下葭蘆鎮主楊廣香詔

建元元年

昔絕國入贄美稱前冊殊俗內款聲流往記僞虜葭蘆鎮主陰平郡公楊廣香忽結同族疊起親黨當宋之世遂舉地降敵葭蘆失守華陽暫驚近單使先馳宣揚皇威廣香等追其遠世之誠仰惟新之化肉袒請降復地千里氏羌雜種咸同歸從宜時領納厚加優卹廣香翻迷反正可特量所授部曲酋豪隨名酬賞南齊書氏羌傳

徵明僧紹詔

建元元年冬

朕側席思士，載懷靡外。齊郡明僧紹，標志高栖，耽情墳素，幽貞之操，宜加賞飾。徵爲正員外郎。

南齊書明僧紹傳

上顧歡劉思効詔

朕夙旦惟寅，思弘治道。仲夢嚴濱，垂精管庫。盱食繁懷，其勤至矣。吳郡顧歡，散騎郎劉思効，或至自巨園，或越在冗位，竝能獻書金門，薦辭鳳闕，辨章治體，有協朕心。今出其表外，可詳擇所宜，以時敷奏。歡近已加旂賞，思効可付選銓序，以顯讜言。

南齊書顧歡傳

答劉休詔

建元初

卿職當國司，以威裁爲本，而忽憚世誚，卿便應辭之。如事可獲，何惰晚節邪？

南齊書劉休傳

遣還流徙詔

建元二年二月

江西北民避難流徙者，制遣還本土。蠲今年租稅，單貧及孤老不



能自存者卽聽番籍郡縣押領

南齊書高帝紀下

除宥詔

建元二年六月

昔歲水旱曲赦丹陽二吳義興四郡遭水尤劇之縣元年以前三調未充虛列已畢官長局吏應共償備外詳所除宥

南齊書高帝紀下

詔朝臣

建元二年

黃籍民之大紀國之治端自頃氓俗巧僞爲日已久至乃竊注爵位盜易年月增損三狀冒襲萬端或戶存而文書已絕或人在而反託死叛停私而云隸役身強而稱六疾編戶齊家少不如此皆政之巨蠹教之深疵比年雖卻籍改書終無得實若約之以刑則民僞已遠若緩之以德則勝殘未易卿諸賢竝深明治體可各獻嘉謀以振澆化又臺坊訪募此制不近優刻素定閑劇有常宋元嘉以前茲役恆滿大明以後樂補稍絕或緣寇難頻起軍蔭易多民庶從利投坊者寡然國經未變朝紀恆存相揆而言隆替何速

此急病之洪源。累景之切思。以何科算革斯弊邪。南齊書虞玩之傳又見通典三

贈諡劉善明詔

建元二年

善明忠誠夙亮。幹力兼宣。豫經夷嶮。勤績昭著。不幸殞喪。痛悼於懷。贈左將軍豫州刺史諡烈伯。南齊書劉善明傳

遣呂安國安集司州詔

建元二年

郢司之間。流雜繁廣。宜竝加區判。定其隸屬。參詳兩州。事無專任。安國可暫往經理。以本官使持節總荆郢諸軍北討。事屯義陽西關。南齊書呂安國傳

銓序垣崇祖等詔

建元二年

醜虜送死。敢寇壽春。崇祖盤龍。正勤義勇。乘機電奮。水陸斬擊。墟川蔽野。師不淹晨。西蕃剋定。斯實將率用命之功。文武爭伐之力。凡厥勳勤。宜時銓序。可符列上。南齊書周盤龍傳

遣李安民援徐兗詔

建元三年

青徐泗州義舉雲集安民可長轡遐馭指授羣帥南齊書李安民傳

立學詔建元四年正月

立國學置學生百五十人其有位樂入者五十人生年十五以上

二十以還取王公已下至三將著作郎廷尉正太子舍人領護諸

府司馬諮議經除敕者諸州別駕治中等見居官及罷散者子孫

悉取家去都二千里爲限南齊書禮志上

南齊書高帝紀下有建元四年正月立學詔編入江淹集中

蠲復建元已來戰亡家租布雜役詔建元四年正月

比歲申威西北義勇爭先殞氣寇場命盡王事戰亡蠲復雖有恆

典主者遵用每傷簡薄建元以來戰亡賞蠲租布三十年雜役十

年其不得收屍主軍保押亦同此例南齊書高帝紀下

大漸召褚淵王儉詔建元四年三月

吉本布衣素族念不到此因藉時來遂隆大業風道沾被升平可

期遘疾彌留。至於大漸。公等奉太子如事吾。柔遠能邇。輯和內外。  
當令太子敦睦親戚。委任賢才。崇尚節儉。弘宣簡惠。則天下之理  
盡矣。死生有命。夫復何言。

南齊書高  
帝紀下

賜進士出身一品銜廣東等處提刑按察使司按察使兼管驛傳事務黃岡王毓藻校刊

全齊文卷二

烏程嚴可均校輯

高帝二

敕荀伯玉

昇明初

我出行日城中軍悉受長懋節度我雖不行內外直防及諸門甲

兵悉令長懋時時履行

南齊書文惠太子傳

與劉懷慰手敕

有文事者必有武備今賜卿玉環刀一口

南齊書劉懷慰傳齊國建以懷慰爲齊郡太守

手

敕世子蹟

三昧至性如此恐不濟汝可與共往每抑割之

南史四十三武陵王彧母羅氏從高

帝在淮陰以罪誅彧年四歲每慟吐血高帝敕武帝云云三昧星小字也

敕荅柳引

柏年幸可不爾為之恨恨

口口口口口口范柏年為梁州刺史沈攸之事起遣將聲援京師而候望形勢

胡延許為府左史因執誅之引稱敗太祖敕答

手敕張岱

建元元年

大邦任重乃未欲回換但總戎務殷宜須望實今用卿為護軍加

給事中

南齊書張岱傳

敕桓景真

主衣中似有玉介導此制始自大明末後泰始尤增其麗畱此置

主衣政是興長疾源可即時打碎凡復有可異物皆宜隨例也

南齊書

高帝紀下

敕垣崇祖修理芍陂田

建元二年

卿視吾是守江東而已耶所少者食卿但努力營田自然平珍虞

寇昔魏置典農而中都足食晉開汝潁而河汴委儲卿宜勉之

南齊書

垣崇祖傳又見通典二

敕給垣崇祖鼓吹

韓白何可不與眾異給鼓吹一部南史二

敕劉懷慰

聞道標分明來其兒婦竝在都與諸弟無復同生者凡此類無為

不多方悞之縱不全信足使豺狼疑惑南齊書薛淵傳處遣將薛

淵之親近救齊郡太守劉懷慰云

云合為淵書與道標示購之之意

敕柳世隆建元二年

歷陽城大恐不可卒治正宜斷隔之深為保固處分百姓若不將

家守城單身亦難可委信也南齊書柳世隆傳

吾更歷陽外城若有賊至勒百姓守之故應勝割棄也同上

比思江西蕭索二豫兩辦為難議者多云省一足一於事為便吾

謂非乃乖謬卿以為云何可具以聞同上垣崇祖既破虜上

敕周山圖建元二年



知卿綏邊撫戎甚有次第應變策略悉以相委恐列醜未必能送  
死卿丈夫無可藉手耳

南齊書周山圖傳上策虞必不出淮陰乃救山圖

卿當盡相帥取理每存全重天下事唯同心力山岳可摧然用兵  
當使背後無憂慮若後冷然無橫來處閉目痛打無不摧碎吾政  
應鑄金待卿成勳耳若不藉此平四州非丈夫也努力自運勿令  
他人得上功

南齊書周山圖傳是時江北四州起義上使山圖自淮入清倍道應赴救山圖

手救餉周盤龍妾杜氏

餉周公阿杜

南齊書周盤龍傳上送金銀絹

救陳顯達

建元二年

虜經破散後當無復他關理但國家邊防自應過存備豫宋元嘉  
二十七年後江夏王作南兗徙鎮盱眙沈司空亦以孝建初鎮彼  
政當以淮上要於廣陵耳卿謂前代此處分云何今僉議皆云卿  
應據彼地吾未能汝乃當以擾動文武爲勞若是公計不得憚之

南齊書陳

顯達傳

敕柳世隆建元三年

比有北信賊猶治兵在彭城年已垂盡或當未必送死然豺狼不可以理推爲備或不可懈彼郭既無關要用宜開除使去金城三十丈政佳耳發民治之無嫌若作三千人食者已有幾米可指牒付信還民間若有丁多而細口少者悉令戍非疑也南齊書柳世隆傳

昨夜得北使啟鍾離間賊已渡淮既審送死便當制加勦撲卿好參候之有急令諸小戍還鎮不可賊至不覺也賊既過淮不容迴退散要應有處送死者定攻壽陽吾當遣援軍也南齊書柳世隆傳

呂安國近在西土斷郢司二境上雜民大佳民殆無驚恐近又令垣豫州斷其州內商得崇祖啟事已行竟近無云云殊稱前代舊意卿視兗部中可行此事不若無所擾春便就手也南齊書柳世隆傳

敕崔文仲建元三年

北閭起義者眾深恐良會不再至卿善獎沛中人若能一時攘袂

當遣一佳將直入也

南齊書崔祖思傳

敕江謐

建元三年

江謐寒士誠當不得競等華儕然甚有才幹堪爲委遇可遷掌史

部

南齊書江謐傳

敕周盤龍

建元三年

甬城連口賊始復進西道便是無賊卿可率馬步下淮陰就安民

軍鍾離船少政可致衣仗數日糧軍人扶維步下也

南齊書周盤龍傳

與王珍國手敕

卿愛人治國甚副吾意也

梁書王珍國傳遷南譙太守治有能名齊高帝手敕

南齊書高帝紀上有昇明元年問月出屯新亭教編入江淹集中

敕國內令

國內殊死以下今月十五日昧爽以前一皆原赦鯁寡孤獨不能

自存者賜穀五斛府州所領亦同蕩然

南齊書高帝紀上昇明三年三月丁巳下令

上表誅黃回

昇明二年四月

黃回出自廝伍本無信行仰值泰始謬被驅馳階藉風雲累叨顯位及沈攸之作逆事切戎機臣闇於知人冀其搏噬遺統前鋒竟不接刃軍至郢城乘威迫脅陵掠所加必先尊貴武陵王馬器服咸被虜奪城內文武剝剔靡遺及至還都縱恣彌甚先朝御服猶有二輿弓劍遺思尚在車府回遂啟求以擬私用僭侮無厭罔顧天極又廣納逋亡多受劫盜親信此等並爲爪牙觀其凶狡憂在不測惡積臯著非可含忍應加勦除以明國憲尋其覺狀寔宜極法但嘗經將帥微有塵露臯疑從輕事炳前策請在降滅特原餘嗣臣過荷隆寄言必罄誠謹陳管穴式遵宏典伏願聖明特垂允鑒臣思不出位誠昧甄才追言既往伏增慙慙

宋書黃回傳抗倭將帥謀應袁粲攻齊王於朝堂事既不果齊王撫之如舊至是以回終爲禍亂乃上表誅之

與褚淵袁粲書

下官常人志不及遠隨運推斥妄踐非涯才輕任重夙宵冰惕近  
值國危含氣同奮沉在下官監吝身命履冒鋒炭報効恆理而褻  
嘉之典偏見甄沐貴登端戎秩加爵土瞻言霄衢魂神震墜下官  
奉上以誠率性無矯前後忝荷未嘗固讓至若今授特深惟迫寔  
以銜恩先旨義兼陵闕識蔽防萌宗國構禍引誚歸咎既已覩顏  
乃復乘災求幸藉亂取貴斯實國之恥非臣子所忍也且榮不可  
濫寵不可昧乞蠲中候請停增邑庶保止足輸効淮湄如使伐匈  
奴凱歸反旆以此受爵不復固辭矣南齊書褚淵傳元徽二年太  
兗州增戶邑太祖固讓  
與淵及衛軍袁粲書

與虞玩之書

張華爲度支尚書事不徒然今漕藏有闕吾賢居右丞已覺金粟  
可積也南齊書虞玩之傳元徽中爲右丞時太  
祖參政與玩之書又見通典二十二

與江夏內史書

汝既入朝當須文武兼資人與汝意合者委以後事世隆其人也  
南齊書柳世隆傳朝廷疑憚沈攸之密爲之備太祖與世祖書

報沈攸之書

辱足下誚書交道不終爲恥已足欲下便來何故多罔君子吾結  
髮入仕豈期遠大蓋感子路之言每不擇官而宦逮文帝之世初  
被聖明鑒賞及孝武之朝復蒙英主顧眄因此感激未能自反及  
與足下斂袂定交款著分好何嘗不勸慕古人國士之心務重前  
良忠貞之節至於契闊杯酒殷勤攜袖薦女成姻志相然諾義信  
之篤誰與間之又乃景和陵處事切憂畏明帝正位運同休顯啟  
臆論心安危豈貳元微之季聽高道慶流言欲相討伐發威施救  
已行內外于時臣子鉗口道路以目吾以分交義重患難宜均犯  
陵白刃以相任保悖主手救今封送相示豈不畏威念周旋之義

耳推此陰惠何愧懷抱不云足下猥含禍譖前遣王思文所牒朝  
事蓋情等家國共詳衷否虚心小大必以先輸問張雍州遷代之  
日將欲誰擬本是逆論來事非欲代張乃封此示張激使見怒若  
張惑一言果興怨恨事負雅素君子所不可爲況張之奉國忠亮  
有本情之見與意契不貳邪又張雍州啟事稱彼中蠻動兼民遭  
水患敕令足下思經拯之計吾亦有白論國如家布情而往每思  
虛達事之相接恆必猜離反謂無故遣信此乃覘察平諒之襟動  
則相阻傷負心期自誰作故先時足下遣信尋盟敦舊厲以篤終  
吾止附還白申罄情本契然遠要方固金石今日舉錯定是誰惡  
久言邪元徽末德執亡禋祀足下備聞無待亟述太后惟憂式遵  
前誥興毀之略事屬鄙躬黜昏樹明實惟前則宣宗靜國何愧前  
修廢立有章足下所允冠獎之譏將以何語封爲郡王宣爲失禮  
景和無名方之不愈乎龍逢自匹夫之美伊霍則社稷之臣同異

相乘非吾所受也。登齋有賞，壽寂已蒙之於前。同謀獲功，明皇亦行之於昔。此則接踵成事，誰敢異之？謂其大收宮女，劫奪天藏器械，金寶必充私室，必若虛設市虎，亦可不翅此言。若以此詐民，天下豈患無眼？心苟無瑕，非所耿耿。甲杖之授，事既舊典，豈見有任鎮邦家、勳經定主而可得出入輕單、不資寵衛斯之患慮？豈直身憂祇奉此恩、職惟事理、朱方之牧、公卿僉意、吾亦謂微勳之次，無忝一州？且魏晉舊事，帝鄉蕃職，何嘗豫州必曹、司州必馬、折膠受柱、在體非愧？袁粲據石頭，足下無不可。吾之守東府，來告便謂非動容見疾，頻笑入戾，乃如是乎？袁粲劉秉受遇深重，家國旣安，不思撫鎮，遂與足下表裏潛規。據城之夜，豈顧社稷？幸天未長亂，宗廟有靈，卽與褚衡軍協謀義斷，以時殄滅。想足下聞之，悵然孤沮。小兒忝侍中，代來之澤，遇直上臺，便呼一家兩錄，發不擇言。良以太甚，吾之方寸，古列共言，乃以陶庾往賢，大見譏責。足下自省，詎



得以此見貽耶。比蹤夷叔論吾則可行過桀蹠無乃近誣哉。謂吾不朝此則良誨朝之與否想更問之足下受先帝之恩施擁戎西州鼎湖之日率土載奔而寔安中流酣飲自若卽懷狼望陵侮皇朝晉熙殿下以皇弟代鎮而斷割候迎罔蔑宗子驅略土馬悉以西上郢中所遺僅餘劣弱昔徵茅不入猶動義師況荊州物產雍嶠交梁之會自足下爲牧薦獻何品良馬勁卒彼中不無良皮美鬬商賈所聚前後貢奉多少何如唯聞太官時納飲食耳桂陽之難坐觀成敗自以雍容漢南西伯可擬賴原卽天世非望亦消又招集逋亡斷遏行侶治舟試艦恆以朝廷爲旗的秣馬按劍常願天下有風塵爲人臣者固若是耶至乃不遵制書敕下如空國恩莫行命令擁隔詔除郡縣輒自板代罷官去職禁還京師凶人出境無不千里尋躡而反募臺將來必厚加給賞太妃遣使市馬齎寶往蜀足下悉皆斷折以爲私財此皆遠邇共聞暴於視聽主上

澈明當璧，寓縣同慶，絕域奉贄，萬國通書，而盤桓百日，始有單騎，  
事存送往，於此可徵，不朝如此，誰應受訄，反以見呵，非所反側，今  
乃勒兵以闢象館，長戟以指魏闕，不亦爲忠臣孝子之所痛心疾  
首邪？賢子元珍，獲免虎口，及凌波西邁，吾所發遣，猶推素懷，不畏  
噬嗑，足下尙復滅君臣之紀，況吾布衣之交乎？遂事不諫，既往難  
咎，今六師西向，爲足下憂之。南齊書張敬兒傳：按周顒傳云：流  
則此書顒所作，而其大略乃高帝口授也。今故編入高帝文。  
與王廣之書

黃回雖有微勲，而罪過轉不可容，近遂啟請御大小二輿爲刺史  
服飾，吾乃不惜爲其啟問，政恐得輿復求畫輪車，此外罪不可勝  
數，弟自悉之。今啟依法。南齊書王廣之傳

書

吾今至破垆在路，粗可尋還，遲見卿不遠，願信知卿深意也。高化閣帖

與崔祖思書

明居士標意可重。吾前旨竟未達邪。小涼欲有講事。卿可至彼。具述吾意。令與慶符俱歸。

不食周粟而食周薇。古猶發議。在今寧得息談邪。卿以爲笑。南齊書明

僧紹傳

與王延之書

韜云卿未嘗有別意。當緣劉家月旦故邪。南齊書王延之傳。延之爲江州刺史。每飲餽下

都阮韜與朝士同列。太祖聞其如此。與延之書。

譬劉悅書

承至性毀瘵。轉之危慮。深以酸怛。終哀全生。先王明軌。豈有去繼。繼徹溫席。以此悲號。得終其孝性邪。當深願往旨。少自抑勉。南齊書劉

悅傳

報武陵王昱

見汝二十字諸兒作中最高優者但康樂放蕩作體不辭有首尾  
安仁士衡深可宗尚顏延之抑其次也

南齊書武陵王昱傳國作  
短句詩學謝靈運體以呈

報上

答劉善明

省所獻雜語竝列聖之明規眾智之深軌卿能憲章先範纂錄情  
識忠款既昭淵誠肅著當以周旋無忘聽覽也

南齊書劉善明傳  
撰賢聖雜語奏之  
託以諷諫上答

又答劉善明

具卿忠讜之懷夫賞罰以懲守宰飾館以待遐荒皆古之善政吾

所宜勉更撰新禮或非易制國學之美已敕公卿宣陽門今敕停

算德多闕思復有聞

南齊書劉善明傳善明又諫起宣陽門表陳  
宜明守宰賞罰立學校制齊禮廣開賓館以

揚鄰國  
上又答

答蕭景先

風俗淪敗二十餘年以吾當之豈得頓埽幸得數載盡力救蒼生者必有功於萬物也治天下者雖聖人猶須良佐汝等各自竭不憂不治也

柳上德化之美上答之

答楊公則啟經略之宜

建元三年

文弘罪不可恕事中政應且加恩耳卿若能襲破白水必加厚賞

南齊書氏美傳晉壽太守敗經略之宜上答

答褚淵

建元中

公所道臧榮緒吾甚志之其有史翰欲令入天祿甚佳

南齊書臧榮緒傳

卽位告天文

皇帝臣道成敢用玄牡昭告皇皇后帝宋帝陟鑒乾序欽若明命以命於道成夫肇自生民樹以司牧所以闡極則天開元創物肆茲大道天下惟公命不干常昔在虞夏受終上代粵自漢魏指讓

中葉咸炳諸典謨載在方冊水德既微仍世多故寔賴道成匡拯之功以弘濟於厥艱大造顛墜再構區宇宣禮明刑締仁緝義畧緯凝象川岳表靈誕惟天人因弗和會乃仰協歸運景屬與能用集大命於茲辭德匪嗣至於累仍而羣公卿士庶尹御事爰及黎獻至於百我僉曰皇天眷命不可以固違人神無託不可以曠主畏天之威敢不祇從鴻厯敬簡元辰虔奉皇符升壇受禪告類上帝以永答民衷式敷萬國惟明靈是饗

南齊書高帝紀下又見南史四

賜進士出身二品銜廣東等處提刑按察使司按察使兼管驛傳事務黃岡王統藻校刊

全齊文卷三

烏程嚴可均校輯

武帝一

帝諱頤字宣遠小名龍兒高帝長子初爲尋陽國侍郎辟州西曹書佐出爲贛令泰始中徵爲尚書庫部郎征北中兵參軍封西陽縣子帶南東莞太守越騎校尉正員郎撫軍長史襄陽太守轉監朔將軍廣興相元徽中轉司徒右長史黃門郎出爲鎮西長史江夏內史行郢州事昇明初爲左衛將軍轉散騎常侍征虜將軍江州刺史封聞喜縣侯徵侍中領軍將軍轉散騎常侍尚書僕射中軍大將軍開府儀同三司進爵爲公齊國建爲齊公世子加侍中南豫州刺史進爵王太子高帝受禪爲皇太子以建元四年二月卽位明年改元永明在位十一年諡曰武皇帝廟號世祖



下内外官詔

建元四年三月

喪禮雖有定制先旨每存簡約内官可三日一還臨外官聞一日

還臨後有大喪皆如之

南齊書武帝紀

原城直詔

建元四年三月

城直之制歷代宜同頃歲逋弛遂以萬計雖在憲宜懲而原必可

亮積年逋城可悉原蕩自茲以後申明舊科有違糾裁

南齊書武帝紀

賑卹貧民詔

比歲未稔貧窮不少京師二岸多離其弊遣中書舍人優量賑卹

南齊書武帝紀

賑卹災民詔

建元四年五月

頃水雨頻降潮流荐滿二岸居民多所淹漬遣中書舍人與南縣

官長優量賑卹

南齊書武帝紀

訊獄蠲租詔

建元四年六月

水潦爲患，星緯乖序，京都囚繫可尅，日訊決諸遠獄，委刺史以時

察判。建康秣陵二縣貧民，加賑賜，必令周悉。吳興義興遭水，縣蠲

除租調。

南齊書  
武帝紀

恤垣康詔。

建元四年七月

康昔預南勲，義兼常懷，倍深惻愴。凶事所須，厚加料理。

南齊書  
垣康傳

司徒褚淵薨，下詔。

建元四年八月

司徒奄至薨逝，痛怛慟懷。比雖厄瘵，便力出臨哭，給束圍祕器，朝

服一具，衣一襲，錢二十萬，布二百疋，蠟二百斤。

南齊書  
褚淵傳

贈諡褚淵詔。

建元四年八月

夫褒德所以紀民，慎終所以歸厚。前王習祖盛典，咸必由之。故侍

中司徒錄尚書事，新除司空領驛騎將軍南康公淵，履道秉哲，鑒

識弘曠，爰初弱齡，清風夙舉，登庸應務，具瞻允集。孝友著於家邦，

忠貞彰於亮采。佐命先朝，經綸王化，契闕屯夷，綢繆終始。摠錄機

衡四門惟穆諒以同規往古式範來今謙光彌遠屢陳降挹權從  
向旨用虧大猷將登上列永翼聲教天不憖遺奄焉薨逝朕用震  
慟於厥心其贈公太宰侍中錄尚書公如故給節加羽葆鼓吹增  
班劍為六十人葬送之禮悉依宋太保王弘故事諡曰文簡南齊書

文詔

淵妻宋故巴西公主埏隧暫啟宜贈南康郡公夫人上同

宣旨緣淮戍將臨會詔建元四年九月

緣淮戍將久處邊勞三元行始宜沾恩慶可遣中書舍人宣旨臨

會後每歲皆如之南齊書武帝紀又見南史四

追恤宋建平王景素詔初即位

宋建平王劉景素名父之子少敦清尚雖末路失圖而原心有本

年流運改宜弘優澤可聽以王禮還葬舊墓宋書建平王宏傳又略見南史十四

優獎守宰詔 永明元年正月

經邦之寄寔資蒞民守宰祿俸蓋有恆準往以邊戍告警故沿時損益今區寓寧晏庶績咸熙念勤簡能宜加優獎郡縣丞尉可還

田秩

南齊書武帝紀又見南史四

甄黜守宰詔 永明元年三月

宋德將季風軌陵遲列宰庶邦彌失其序遷謝逆連公私凋弊泰運初基草昧惟始思述先範永隆治根蒞民之職一以小滿爲限其有聲績剋舉厚加甄異理務無庸隨時代黜

南齊書武帝紀

申辛亥赦恩詔

朕自丁繁毒奄便周忌瞻言負荷若墜淵壑而遠圖尙蔽政刑未理星緯失序陰陽愆度思橋先澤兼酬天胥可申辛亥赦恩五十日以期訖爲始京師囚繫悉皆原有三署軍徒優量降遣都邑鰥寡尤貧詳加賑卹

南齊書武帝紀

又詔

四方見囚罪無輕重及劫賊餘口長徒救繫悉原赦逋負督贓建

元四年三月以前皆特除

南齊書武帝紀

改葬袁粲等詔

永明元年四月

昔魏矜袁紹恩給巨墳晉亮兩王榮覃餘裔斯蓋懷舊流仁原心

興荷二代弘義前載美談袁粲劉秉竝與先朝同獎宋室沈攸之

於景和之世特有乃心雖末節不終而始誠可錄歲月彌往宜沾

優隆粲秉前年改葬塋兆未脩材官可爲經略粗合周禮

南齊書作材梓

可爲經理令

攸之及其諸子喪柩在西可符荊州以時致送還反

舊墓在所營葬事

宋書袁粲傳南齊書武帝紀又略見南史二十六

誅垣崇祖詔

永明元年四月

垣崇祖凶詭險躁少無行業昔因軍國多虞採其一夫之用大運

光啟頻煩升擢溪壑靡厭浸以彌廣去歲在西連謀境外無君之

心已彰遐邇特加遵養庶或後革而猜貳滋甚志興亂階隨與荀伯玉驅合不逞窺窬非覬構扇邊荒互爲表裏寧朔將軍孫景育究悉姦計具以啟聞除惡務本刑茲罔赦便可收掩肅明憲辟

書垣崇

祖傳

誅張敬兒詔

永明元年五月

敬兒蠢茲邊裔昏迷不脩屬值宋季多難頗獲野戰之力拔迹行伍超登非分而愚躁無已矜伐滋深往蒞本州久包異志在昔含弘庶能懲革位班三槐秩窮五等懷音靡聞姦回屢構去歲迄今嫌貳滋甚鍾東將軍敬則丹陽尹安民每侍接之日陳其凶狡必圖反噬朕猶謂恩義所感本質可移頃者已來疊戾遂著自以子弟在西足動殊俗招扇羣蠻規擾樊夏假託妖巫用相震惑妄設徵祥潛圖問鼎履霜於開運之辰堅冰於嗣業之世此而可忍孰不可容天道禍淫逆謀顯露建康民湯天獲商行入蠻備觀姦計

信驛書翰證驗炳明便可收掩式正刑辟同黨所及特皆原有南齊書張敬

兒傳

報薛淵詔 永明元年

遠隔殊方聲問難審淵憂迫之深固辭朝列昔東關舊典猶通婚

宦況母出行差音息時至依附前例不容申許便可斷表述還章

服南齊書謝薛淵傳

罪謝超宗詔 永明元年

超宗疊同大逆罪不容誅象匿情欺國愛朋罔主事合極法特原

收治免官如案禁錮十年南齊書超宗傳

封茹法亮詔 永明元年

茹法亮近在盆城頻使銜命內宣朝旨外慰三軍義勇齊奮人百

其氣險阻艱難心力俱盡宜沾茅土以甄忠績封望蔡縣男食邑

三百戶南齊書茹法亮傳

青溪宮落成小會詔 永明二年七月

夫樂所自生先哲垂誥禮不忘本積代同風是以漢光遲回於南陽魏文殷勤於譙國青溪宮體天含暉則地栖寶光定靈源允集符命在昔期運初開經綸方遠繕築之勞我則未暇時流事往永惟哽咽朕以寡薄嗣奉鴻基思存締構式表王迹考星創制揆日興功子來告畢規摹昭備宜申釁落之禮以暢感尉之懷可克日小會

南齊書武帝紀

加恩京師二縣詔 永明二年八月

乞枯掩骼義重前誥卹老哀癯是惟令典朕永思民瘼弗忘鑒寐聲懷未敷物多乖所京師二縣或有久墳毀發可隨宜掩埋遺骸未輟並加斂瘞疾病窮困不能自存者詳爲條格並加沾賚

南齊書武帝紀

增封豫章王嶷詔 永明二年



漢之梁孝寵異列蕃晉之文獻秩殊恆序況乃地侔前准勳兼往式雖天倫有本而因事增情宜廣田邑用申恩禮增封爲四千戶

南齊書豫章王嶷傳

詔報扶南國王

永明二年

具摩醯降靈流施彼土雖殊俗異化遙深欣讚知鳩酬羅於彼背叛彌據林邑聚凶肆掠殊宜翦討彼雖介遐阻舊修蕃貢自宋季多難海譯致壅皇化惟新習迷未革朕方以文德來遠人未欲便興干戈王旣款列忠到遠請軍威今詔交部隨宜應接伐叛柔服實惟國典勉立殊效以副所期那伽仙屢銜邊譯頗悉中土闊狹令其具宣上報以絳紫地黃碧綠紋綾各五匹

南齊書扶南國傳

興學詔

永明三年正月

春秋國語云生民之有學教猶樹木之有枝葉果行育德咸必由茲在昔開運光宅華夏方弘典謨克隆教思命彼有司崇建庠塾

甫就經始仍離屯故仰瞻徽猷歲月彌遠今遐邇一體車軌同文  
宜高選學官廣延胄子

南齊書  
武帝紀

### 考課詔

守宰親民之要刺史案部所先宜嚴課農桑相土揆時必窮地利  
若耕蠶殊眾足厲浮墮者所在卽便列奏其違方驕矜佚事妨農  
亦以名聞將明賞罰以勸勤怠校覈殿最歲竟考課以申黜陟

南齊書

武帝紀

荅豫章王嶷求解大傅詔

永明三年

公惟德惟行無所厝辭且魯且衛其誰與二方式範當時流聲史  
籍豈容屢秉撝謙以乖期寄

南齊書豫  
章王嶷傳

蠲孤獨田租詔

永明三年五月

氓俗凋弊于茲永久雖年穀時登而歉乏比室凡單丁之身及勞  
獨而秩養養孤者並蠲今年田租

南齊書  
武帝紀

下梁彌頡詔

永明三年八月

行宕昌王梁彌頡忠款內附著績西服宜加爵命式隆蕃屏可使

持節督河涼二州諸軍事安西將軍東羌校尉河涼二州刺史隴

西公宕昌王

南齊書  
氏羌傳

皇太子釋奠詔

永明三年十月

皇太子長懋講畢當釋奠王公以下悉往觀禮

南齊書  
武帝紀

耕藉詔

永明三年十二月

九穀之重人材爲末是故潔粢豐盛祝史無愧於辭不藉千畝周

宣所以貽諫昔期運初啟庶政草昧三推之典我則未暇朕嗣奉

鴻基思隆先軌載耒躬親率由舊式可以開春發歲敬簡元辰鳴

青鸞於東郊冕朱紘而若事仰薦宗禋俯賜黔阜將使圉庾內充

遺秉外物既富而教茲焉攸往

南齊書  
武帝紀

進河南王易度侯爲車騎大將軍詔

永明三年

易度侯宇職西蕃綏懷允緝忠績兼舉朕有嘉焉可進號車騎大

將軍

南齊書河  
南氏羌傳

耕藉恩詔 永明四年閏正月

夫耕藉所以表敬親載所以率民朕景行前規躬執良耜千畝咸  
事六稔可期教義克宣誠感兼暢重以天符靈貺歲月鱗萃寶鼎  
開玉匣之祥嘉禾發同穗之穎甘露凝暉於桐牧神爵奮翥於蘭  
園斯乃宗稷之慶豈寡薄所臻思俾休和覃茲黔阜見刑罪殊死  
以下悉原宥諸逋負在三年以前尤窮弊者一皆蠲除孝悌力田  
詳授爵位孤老貧窮賜穀十石凡欲附農而糧種闕乏者並加給  
貸務在優厚

南齊書  
武帝紀

車駕幸宣武堂講武詔 永明四年閏月

今親閱六師少長有禮領馭羣帥可量班賜

南齊書  
武帝紀

定戶租錢布詔 永明四年五月

揚南徐二州今年戶租三分二取見布一分取錢來歲以後遠近

諸州輸錢處並減布直匹淮四百依舊折半以爲永制

南齊書武帝紀

沈冲卒下詔

永明四年

冲喪柩至止側愴良深以其昔在南蕃特兼閔悼

南齊書沈冲傳

贈諡沈冲詔

冲貞詳閑理志局淹正誠著蕃朝績彰出守不幸早世朕甚悼之

追贈太常諡曰恭子

南齊書沈冲傳

贈諡李安民詔

永明四年

安民歷位內外庸績顯著忠亮之誠每簡朕心敷政近畿方申任

寄奄至殞喪痛傷於懷贈鎮東將軍鼓吹一部常侍太守如故諡

曰肅侯

南齊書李安民傳

下楊集始等詔

永明四年

後起奄至殞逝側愴予懷緩御還服宜詳其選行輔國將軍北秦

州刺史武都王楊集始、韓局、沈亮，乃心忠款，必能紓境甯民，宣揚聲教，可持節輔國將軍、北秦州刺史、平羌校尉、武都王。後起弟後明爲龍驤將軍、白水太守、集始弟集朗爲監朔將軍。南齊書氏羌傳

賜孤貧糧餼詔

永明五年正月

朕昧爽丕顯，思康民瘼。雖年穀亟登，而飢饉代有。今履端肇運，陽和告始，宜協時休，覃諸黎庶。諸孤老貧病，並賜糧餼，遣使親賦，每存均普。南齊書武帝紀

遣蕭景先討蠻詔

永明五年正月

得雍州刺史張瓌啟事，蠻虜相扇，容或侵軼。蜂螫有毒，宜時剿蕩。可遣征虜將軍丹陽尹景先總率步騎，直指義陽，可假節、司州諸軍，皆受節度。南齊書蕭景先傳

賑賜京師二縣災民詔

永明五年六月

比霖雨過度，水潦洊溢，京師居民多離其弊。遣中書舍人二縣官

長隨宜賑賜

南齊書  
武帝紀

停丹陽屬縣逋租詔

永明五年七月

丹陽屬縣建元四年以來至永明三年所逋田租殊爲不少京甸

之內宜加優貸其非中貲者可悉原停

南齊書  
武帝紀

蠲吳興義興租調詔

八月

今夏雨水吳興義興二郡田農多傷詳蠲租調

南齊書  
武帝紀

幸商飢館詔

九月

九日出商飢館登高宴羣臣

南齊書  
武帝紀

和市詔

九月

善爲國者使民無傷而農益勸是以十一而稅周道克隆開建常  
平漢載惟穆岱畎絲枲浮汶來貢杞梓皮革必緣楚往自水德將  
謝喪亂彌多師旅歲興饑饉代有貧室盡於課調泉貨傾於絕域  
軍國器用動資四表不因厥產咸用九賦雖有交貿之名而無潤

私之實民咨塗炭是此之由昔在開運星紀末周餘弊尙重農桑不殷於曩日粟帛輕賤於當年工商罕兼金之儲匹夫多飢寒之患良由圖法久廢上幣稍寡所謂民失其資能無匱乎凡下貧之家可蠲三調二年京師及四方出錢億萬糴米穀絲綿之屬其和價以優黔首遠邦嘗市雜物非土俗所產者皆悉停之必是歲賦攸宜都邑所乏可見直和市勿使逋刻

南齊書武帝紀

蕭景先卒下詔

永明五年

西信適至景先奄至喪逝悲懷切割不自勝任今便舉哀賻錢十萬布二百疋

南齊書蕭景先傳

贈蕭景先詔

永明五年

故假節征虜將軍丹陽尹新吳侯景先器懷開亮幹局通敏綢繆少長義兼勳戚誠著夷險績茂所司方升寵榮用申任寄奄至喪逝悲痛良深可贈侍中征北將軍南徐州刺史給鼓吹一部假節



侯如故諡曰忠侯

南齊書蕭景先傳

贈蕭徽明詔

永明五年

龍驤將軍安西中兵參軍松滋令蕭徽明愛敬敦深色養盡禮喪過乎哀遂致毀滅雖未達聖教而一至可愍宜加榮命以矜善人

可贈中書郎

南齊書蕭徽明傳

委太子親決獄詔

永明六年正月

獄訟之重政化所先太子立年作貳宜時詳覽此訊事委以親決

南齊書文惠太子傳

原北邊逋租詔

永明六年閏十月

北兖北徐豫司青冀八州邊接疆場民多懸磬原永明以前所逋

租調

南齊書武帝紀

報梁彌承詔

永明六年

知須軍儀等九種並非所愛但軍器種甚多致之未易內伎不堪

涉遠秘閣圖書例不外出五經集注論今特敕賜王各一部

前漢書

羌傳宕昌王使求軍

儀及襍技請詔報

原雍州通租詔永明七年正月

南齊書武帝紀

雍州頻歲戎役兼水旱為災原四年以前通租

蠲卹貧民詔

春頒秋斂萬邦所以惟懷柔遠能邇兆民所以允殖鄭渾宰邑因

姓立名王濬剖符戶口殷盛今產子不育雖炳常禁比間所在猶

或有之誠復禮以貧殺抑亦情由俗淡宜節以嚴威敦以惠澤主

者尋舊制詳量附定蠲卹之宜務存優厚

南齊書武帝紀

增俸詔

諸大夫年秩隆重祿食殊薄豈所謂下車惟舊趨橋敬老可增俸

詳給見役

南齊書武帝紀

量給孔子祭秩詔永明七年二月

宣尼誕敷文德峻極自天發輝七代陶鈞萬品英風獨舉素王誰匹功隱於當年道深於日月感麟厭世緬邈千祀川竭谷虛邱夷淵塞非但洙泗湮淪至乃饗嘗之主前王敬仰崇脩寢廟歲月亟流鞠爲茂草今學黷興立實稟洪規撫事懷人彌增欽屬可改築宗祊務在爽塏量給祭秩禮同諸侯奉聖之爵以時紹繼南齊書武帝紀

定婚禮詔

永明七年四月

婚禮下達人倫攸始周官設媒氏之職國風興及時之詠四魯內陳義不期侈三鼎外列事豈存奢晚俗浮麗厯茲永久每思懲革而民未知禁乃問同牢之費華泰尤甚膳羞方丈有過王侯富者扇其驕風貧者恥躬不逮或以供帳未具動致推遷年不再來盛時忽往宜爲節文頒之士庶並可擬則公朝方標供設合巹之禮無虧寧儉之義斯在如故有違繩之以法南齊書武帝紀

贈諡王儉詔

永明七年五月

慎終追遠、列代通規、褒德紀勲、彌峻恆策。故侍中中書令太子少  
傅領國子祭酒衛軍將軍開府儀同三司南昌公儉體道秉哲、風  
宇淵曠、肇自弱齡、清猷自遠、登朝應務、民望斯屬、草昧皇基、協降  
鼎祚、宏謨盛烈、載銘彝篆、及贊朕躬、徽績光茂、忠圖令範、造次必  
彰、四門允穆、百揆時序、宗臣之重、情寄兼常、方正位論道、永釐泰  
職、彌茲景化、以贊隆平、天不憖遺、奄焉薨逝、朕用震慟於厥心、可  
追贈太尉侍中中書監公如故、給節加羽葆鼓吹、增班劍為六十  
人、葬禮依故太宰文簡公褚淵故事、冢墓材官營辦、諡文憲公、書王儉傳

吉凶條制詔 永明七年十月

三季澆浮、舊章陵替、吉凶奢靡、動違矩則、或裂錦繡、以競車服之  
飾、塗金鏤石、以窮塋域之麗、至班白不婚、露棺累葉、苟相誇衒、固  
顧大典、可明為條制、嚴勒所在、悉使畫一、如復違犯、依事糾奏、齊書

書武  
帝紀

賜進士出身二品銜廣東等處提刑按察使司按察使兼魯驛傳事務黃岡王毓藻校刊

全齊文卷三終

全齊文卷四

烏程嚴可均校輯

武帝二

大赦詔 永明八年七月

陰陽舛和、緯象愆度、儲胎嬰患、淹厯旬晷、思仰祇天戒、俯紓民瘼、

可大赦天下、南齊書武帝紀

原司雍逋租詔 永明八年七月

司雍二州比歲不稔、雍州八年以前、司州七年以前、逋租悉原、汝

南一郡復限更申五年、南齊書武帝紀

賑卹京邑詔 永明八年八月

京邑霖雨既過、居民汎濫、遣中書舍人二縣官長賑卹、南齊書武帝紀

賑賜吳興詔 永明八年十月

吳興水淹過度、開所在倉賑賜、南齊書武帝紀

全齊文卷四

四

量增尚書郎賜祿詔 永明八年十二月

尚書丞郎職事繁劇卹俸未優可量增賜祿 南齊書武帝紀

黃籍限斷詔 永明八年

夫簡貴賤辨尊卑者莫不取信於黃籍豈有假器濫榮竊服非分故所以澄革虛妄式允舊章然歟起前代過非近失既往之讐不足追咎自宋昇明以前皆聽復注其有謫役邊疆各許還本此後有犯嚴加剪治 南齊書虞玩之傳又見通典三

太廟時薦詔 永明九年正月

太廟四時祭薦宣皇帝麴起餅鴨臠孝皇后筍鴨卵脯醬炙白肉高皇帝薦肉膾菹羹昭皇后茗柵炙魚皆所嗜也 南齊書禮志上又見南史十一

通典四十九

贈謚柳世隆詔 永明九年

故侍中左光祿大夫貞陽公世隆秉德居業才兼經緯少攝清徽

長弘美譽入參內禁出贊西牧專寄郅郊剋挫巨猾超越前勛功  
著一代及總任方州民頌寬德異教崇閣朝稱元正忠謀嘉猷簡  
於朕心雅志素履邈不可踰將登鉉味用燮鴻化奄至薨殞震慟  
良深贈司空班劍三十人鼓吹一部侍中如故諡曰忠武

南齊書  
柳世隆

傳  
賻諡戴僧靜詔

永明九年

僧靜志懷貞果誠著艱難剋殄西虜勳彰運始奄至殞喪惻愴傷

懷賻錢五萬布百匹諡壯侯

南齊書戴  
僧靜傳

以范當根純爲林邑王詔

永明九年

林邑蠢爾介在遐外世服王化當根純乃誠款懼到率其僚職遠  
績克宣良有可嘉宜沾爵號以弘休澤可持節都督緣海諸軍事

安南將軍林邑王

南齊書  
南夷傳

原責逋增祿俸詔

永明十年正月



諸責負眾逋七年以前悉原除高貲不在例孤老六疾人穀五斛

內外有務眾官增祿俸

南齊書武帝紀

豫章王嶷薨下詔

永明十年四月

嶷明哲至親勲高業始德懋王朝道光區縣奄至薨逝痛酷抽割不能自勝奈何奈何今便臨哭九命之禮宜備其制斂以衮冕之服溫明祕器命服一具衣一襲喪事一依漢東平王故事大鴻臚持節護喪事大官朝夕送奠大司馬太傅二府文武悉停過葬

南齊書

豫章王嶷傳

贈豫章王嶷詔

永明十年

寵章所以表德禮秩所以紀功慎終追遠前王之盛策累行疇庸列代之通誥故使持節都督揚徐二州諸軍事大司馬領太子太傅揚州刺史新除中書監豫章王嶷體道秉哲經仁緯義挺清譽於弱齡發韶風於早日締論霸業之初翼讚皇基之始孝睦著於

鄉閭忠諒彰乎邦邑及秉德論道總收神甸七教必荷六府咸理  
振風潤雨無譽於時候卹民拯物有篤於矜懷雍容廊廟之華儀  
形列郡之觀神凝自遠具瞻允集朕友于之深情兼家國方授以  
神圖委諸廟勝緝頌九絃陪禪五岳天不憖遺奄焉薨逝哀痛傷  
惜震慟乎厥心今先遠戒期艱謀襲吉宜加茂典以協徽猷可贈  
假黃鉞都督中外諸軍事丞相揚州牧綠綬綬具九服錫命之禮  
侍中大司馬太傅王如故給九旒鸞輅黃屋左纛虎賁班劍百人  
輜輶車前後部羽葆鼓吹葬送儀依東平王故事

南齊書豫章王嶷傳

賑賜京邑詔

永明十年十一月

頃者霖雨樵糧稍貴京邑居民多離其弊遣中書舍人二縣官長

賑賜

南齊書武帝紀

資遣魏俘詔

永明十年

昔虞帝欽明苗山記倒戈之陣夏君踵武鈞臺載不戰之兵今鋒

鎬陵邊形雲入候加計而後擒待征而知服此乃朕之涼德彼將何德徒哀其積習爲性因染遂變不識天時用干人事雖同濱率境自隔王臣直曰斯民獨爲係虜父母生乖妻兒則桑梓悠悠塋塋萬里情甚悲之可解網改祝聽歸巢穴豈直鄰好足鄙特以哀矜自中以時資遣稱朕意焉

文苑英華六百五十淮陰太守移魏淮陽太守文引詔

配享太祖廟詔

永明十年

故太宰褚淵故太尉王儉故司空柳世隆故驃騎大將軍王敬則故鎮東大將軍陳顯達故鎮東將軍李安民六人配享太祖廟庭

南齊書禮志上

按王敬則死於永泰元年陳顯達死於永元元年今此詔爲永明十年必有誤也

蔣目疑兩故字後人妄增此

乃未死而

預定配享

斬王兪下詔 永明十一年三月

逆賊王兪險詖之性自少及長外飾廉勤內懷凶慝貽戾鄉伍敢乘衣冠拔其文筆之川擢以顯任出牧樊阿政刑弛亂第三息彪

矯弄威權父子均勢故靈巒長史劉興祖忠於奉國每事匡執興  
忿其異己誣以誦謗肆怒囚錄然後奏聞朕察興祖思詐詔送興祖  
還都乃懼茲謀發露潛加殺害欺罔既彰中使辯覈遂援兵登陴  
逆捍王命天威電掃義夫咸奮曾未浹辰罪人斯獲方隅克殄漢  
南肅清自非犯官兼預同逆謀爲一時所驅逼者悉無所問南齊書王

興傳

原長沙王妃詔永明十一年

興自陷逆節長沙王妃男女竝長且興又出繼前代或當有准可  
特不離絕南齊書王興傳興弟仙女爲長沙王晃妃世祖詔

恤災詔永明十一年五月

水旱成災穀稼傷弊凡三調眾逋可同申至秋登京師二縣朱方

姑熟可權斷酒南齊書武帝紀

又詔七月

頃風水爲災，二岸居民多離其患，加以貧病六疾，孤老稚弱，彌足

矜念，遣中書舍人履行沾卹。

南齊書武帝紀

水旱爲災，實傷農稼。江淮之間，倉廩旣虛，遂草竊充斥，互相侵奪。依阻山湖，咸此遁逃。曲赦南兗、兖、豫、司、徐、五州、南豫州之厯陽、譙、臨江、廬江、四郡三調，眾逋宿債，並同原除。其緣淮及青冀新附僑

民，復除已訖。更申五年。

南齊書武帝紀

大漸下詔。

永明十一年七月

始終大期，賢聖不免。吾行年六十，亦復何恨！但皇業艱難，萬機自重，不無遺慮耳。太孫進德日茂，社稷有寄。子良善相毗輔，思弘治道。內外眾事無大小，悉與鸞參懷，共下意。尙書是職務根本，悉委王晏。徐孝嗣軍旅捍邊之略，委王敬則。陳顯達王廣之王玄邈、沈文季、張環、薛淵等百辟庶僚，各奉爾職，謹事太孫，勿有懈怠。知復

何言。

南齊書武帝紀又南史四

又詔

我識滅之後，身上著夏衣，盡天衣，純烏，犀導應，諸器服悉不得用。寶物及織成等，唯裝複袂衣各一通，常所服身及長短二口，織環者，隨我人梓宮祭敬之典。本在囚心，東鄰殺牛，不如西家蛤祭。我靈上慎勿以牲爲祭，唯設餅茶飲干飯酒脯而已。天下貴賤咸同此制。未山陵前，朔望設菜食，陵墓萬世所宅，意當恨休安陵，未稱今可用東三處地，最東邊以葬我，名爲景安陵。喪禮每存省約，不須煩民。百官停六時入臨，朔望祖日可依舊。諸王六宮並不須從山陵內殿，鳳華壽昌耀靈三處是吾所治制。夫貴有天下，富兼四海，宴處寢息不容乃陋，謂此爲奢儉之中，慎勿壞去顯陽殿玉像諸佛及供養具，如別牒可盡心禮拜供養之，應有功德事可專在中，自今公私皆不得出家爲道及起立塔寺，以宅爲精舍，並嚴斷之。唯年六十必有道心，聽朝賢選序，已有別詔。諸小小賜乞及閤

內處分亦有別牒、內外禁衛勞舊、主帥左右、悉付蕭詵優量驅使、  
之勿負吾遺意也。南齊書武帝紀又南史四

臨崩又詔

凡諸遊費、宜從休息、自今遠近薦獻、務存節儉、不得出界營求、相  
高奢麗、金粟綰繡、獎民已多、珠玉玩好、傷工尤重、嚴加禁絕、不得

有違準繩。南齊書武帝紀

敕虞棕賜謝超宗死。永明元年

謝超宗介於彼、賜自盡、勿傷其形骸。南齊書謝超宗傳超宗徙越州行至豫章上表豫章內史

度

敕廬陵王子卿

吾前後有敕、非復一兩過道、諸王不得作乖體格服飾、汝何意都不憶吾敕邪、忽作瑱瑒乘具何意、已成不須壞、可速送下、純銀乘具、乃復可爾、何以作鎗亦是銀、可即壞之、忽用金薄裏箭腳何意

亦速壞去。凡諸服章自今不啟。吾知復事。輒作者。後有所聞。當復

得痛杖。

南齊書廬陵王子卿傳

汝比在都。讀書不就。年轉成長。吾日冀汝美。勿得敕如風過耳。使

吾失氣。

同上

敕謝朓還都

侍讀虞雲自宜恆應侍接。朓可還都。

南齊書謝朓傳

敕徒劉祥

永明中

卿素無行檢。朝野所悉。輕弄骨肉。侮蔑兄嫂。此是卿家行不足。乃無關他人。卿才識所知。蓋何足論。位涉清途。於分非屈。何意輕肆口噉。詆目朝士。造席立言。必以貶裁爲口實。冀卿年齒已大。能自感厲。日望悛革。如此所聞。轉更增甚。誼議朝廷。不避尊賤。肆口極辭。彰暴物聽。近見卿影連珠。寄意悖慢。彌不可長。卿不見謝超宗。其才地二三。故在卿前。事殆是百分不一。我當原卿性命。令卿萬



里思譽卿若能改革當令卿得還

南齊書劉祥傳

敕呂安國

永明四年

吾恆憂卿疾病應有所須勿致難也

南齊書呂安國傳

敕王晏

永明中

慈在職未久既有微疾不堪朝又不能騎馬聽乘車在仗後

南齊書王

慈傳

敕茹法亮

永明六年

吾見呂安國疾狀自不宜勞且卿中既恆惡扶人至吾前於禮望

殊成有虧吾雖敕之其人甚諱病卿可作私意向其若好差不復

須扶人依例入幸勿牽勉

南齊書呂安國傳

又敕

可問蕭惠休吾先使卿宣制荅其勿以私祿足充獻奉今段殊覺

其下情厚於前後人聞之故當不復私私吾欲分受之也

南齊書蕭惠基

傳弟惠休永明四年為廣州刺史罷任  
任時奉領貢上敕中書舍人茹法亮

敕丘冠先子雄  
永明八年

卿父受使河南秉忠守死不辱王命我甚賞惜喪屍絕域不可復

尋於卿後官塗無妨甚有高比  
南齊書河南成羌傳

敕曹虎  
永明八年

廣陵須心腹非吾意可委者不得處此任  
南齊書曹虎傳

敕王晏  
永明九年

世隆雖抱疾積歲志氣未衰冀醫藥有效痊差可期不謂一旦使

為異世痛恨之深此何可言其昔在郢誠心夙悵全保一蕃勲業

克著尋准契闊增泣悲咽卿同在情亦當無已已耶  
南齊書世隆傳

敕晉安王子懋  
永明十一年

吾比連得諸處啟所說不異虜必無敢送死理然為其備不可暫

懈今秋犬羊輩越逸者其亡滅之徵吾今亦行密纂集須有分明

指的便當有大處分、今普救鎮守、並部偶民丁、有事即使應接連、已救更遣、想行有至者、汝共諸人量覓、可使人數往南陽舞陰諸要處、參覷糧食、最爲根本、更不憂人仗、常行視騾亭馬、不可有廢闕、并約語諸州、當其界皆爾、不如法卽周章、

吾敕荆郢二鎮、各作五千人陣、本擬應接彼耳、若迭死者、更卽呼取之、已敕子眞、魚繼宗、設公愍至鎮、可以公愍爲城主、三千人配之、便足、汝可好以階級在意、勿得人求、或超五三階級、文章詩筆、乃是佳事、然世務彌爲根本、可常憶之、汝所啟仗、此悉是吾左右御仗也、云何得用之、品格不可乖、吾自當優量覓迭、

知汝常以書讀在心、足爲深欣也、

並南齊書晉安王子懋傳

策命百濟國王牟大

永明八年

於戲、惟爾世襲忠勤、誠著遐表、滄路肅澄、要貢無替、式循彝典、用纂顯命、往欽哉、其敬膺休業、可不慎歟、制詔行都督百濟諸軍事

鎮東大將軍百濟王牟大今以大襲祖父牟都為百濟王即位章

綬等五銅虎竹符四王其拜受不亦休乎

南齊書東夷傳

任用沈憲啟

縣豈不可治但用不得其人耳

南齊書沈憲傳武陵王暕為會稽以憲為左軍司馬人以此山陰戶

眾難治欲分為兩世祖啟云云乃以憲帶山陰令

與虞綜手書

今因江吏郎有白以君情願意欲相屈

南齊書虞綜傳昇明中世祖為中軍引綜為諮議參

軍使吏部郎江謐持手書謂綜云云

與玄元度書

努力成臂上之相也

玄元度出擊大破之初元度云臂上有封侯

志宋世以示

致沙門法猷書

承遠上無常弟子夜中已自知之遠上此去甚得好處諸佳非一

不復增悲也。一二遲見法師，方可敘瑞夢耳。今正爲作功德，所須

可具疏來也。

高僧傳八釋僧遠，姓皇渤海，重舍人居，煙山五十年。

海延水人，任定林上寺僧，僧正。

荅豫章王疑。

永明元年。

事中恐不得從所陳。

南齊書：豫章王疑傳。永明元年，疑領太子太傅，手敕上上荅。

又荅。

永明二年。

儀刀捉刀，不應省也。使轂白直，乃可共百四五十以還，正是耳。亦不曾聞人道此。吾自不使諸王無仗，況復汝耶？在私園苑中，乘此非疑，郊外鳴角，及合扇竝拂，先乃有不復施用。此來甚久，凡在鎮自異，還京師，先廣州乃立鼓吹，交部遂有輦事，隨時而改，亦復有可得依舊者。汝若有疑，可與王儉諸人量衷，但令人臣之儀，無失便行也。

同上。

傳詔臺家人耳，不足涉嫌。鄣扇吾識及以來，未見故有敕耳。小兒

奴子本非嫌也。吾有所聞。豈容不敕汝。知令物致議耶。吾已有敕。汝一人不省。挾轂但牽之。吾昨不通仗事。儉已道。吾卽令荅。不煩有此敕。須聞言自更一二。同上

茹亮今敕汝所懷。及見別紙。汝勞疾亦復。那得不動。何意爲作煩長啟事。凡諸普救此意可尋。當不關汝一人也。宜有敕事。吾亦必道。頃見汝自更委悉。書不欲多。及屋事慎勿。疆厝此意。白澤亦當不解何意爾。同上

又荅豫章王嶷 永明四年

欺巧那可容。宋世混亂。以爲是不。蚊蟻何足爲憂。已爲義勇所破。官軍昨至今。都應散滅。吾政恨其不辨大耳。亦何時無亡命邪。同上

荅王晏

永明七年

儉年德富盛。志用方隆。豈意暴疾。不展救護。便爲異世。奄忽如此。痛酷彌深。其契闊難違。義重常懷。言尋悲切。不能自勝。痛矣奈何。

往矣奈何

南齊書王儉傳吏部尚書王晏啟及儉喪上答

又答

數常啟吾爲其鼻中惡今既以何屑王瑩還門下故有此回換耳

南齊書江數傳數轉都官尚書領號騎將軍王晏啟上答

答王融請給虜書

永明中

吾意不異卿今所啟比相見更委悉

南齊書王融傳

賜進士出身二品銜廣東等處提刑按察使司按察使兼管驛傳事務黃岡王毓藻校刊

全齊文卷四終

全齊文卷五

烏程嚴可均校輯

鬱林王

王諱昭業字元尙文惠太子長子小名法身武帝卽位封南郡王太子薨立爲皇太孫以永明十一年七月卽位明年改元隆昌在位一年明帝廢之爲鬱林王見弑

卽位下詔永明十一年八月

朕以寡薄嗣膺寶政對越靈命欽若前圖思所以敬守成規拱揖羣后哀荒在日有憐大猷宜育德振民光昭睿範凡逋三調及眾債在今年七月三十日前悉同蠲除其備償封籍貨鬻未售亦皆還主御府諸署池田邸冶興廢沿革本施一時於今無用者詳所罷省公宜權禁一以還民關市征賦務從優減

南齊書鬱林王紀

放遣俘囚詔



近北掠餘口、悉充軍實、刑故無小、罔或攸赦、撫宰興仁、事深審範、宜從蕩宥、許以自新、可一同放遣、還復民籍、已賞賜者亦皆爲贖、

南齊書鬱林王紀

序用勞人詔

往歲蠻虜協謀、志擾邊服、羣帥校畧、大殲凶醜、革城克捷、及舞陰固守、二處勞人、未有沾爵賞者、可分遣選部、往彼序用、南齊書鬱林王紀

詔選部 永明十一年九月

東西二省府國、長屯所積財、單祿寡、良以矜懷、選部可甄才品、能推校年月、邦守邑丞、隨宜量處、以貧爲先、南齊書鬱林王紀

追崇竟陵王子良詔 隆昌元年四月

襲崇明德、前王令典、追遠尊親、沿情所隆、故使持節都督揚州諸軍事、中書監太傅領司徒揚州刺史竟陵王新除督南徐州、體睿履正、神鑒淵邇、道冠民宗、具瞻允集、肇自弱齡、孝友允備、爰及贊

昇協升景業燦曜台陛五教克宣敷奏朝端百揆惟穆寄重先顧  
任均負圖諒以齊暉二南同規往哲方憑保祐永翼雍熙天不憖  
遺奄焉薨逝哀慕抽割震于厥心今龜謀襲吉先遠戒期宜崇嘉  
制式引風烈可追崇假黃鉞侍中都督中外諸軍事太宰領大將  
軍揚州牧綠綬綬備九錫服命之禮使持節中書監王如故給九  
旒鸞輅黃屋左纛輜輶車前後部羽葆鼓吹挽歌二部虎賁班劍  
百人葬禮依晉安平王孚故事

南齊書竟陵王子良傳又見文選齊竟陵王行狀與此小異案南

齊書鬱林王紀有隆昌元年正月詔文苑英華載有全文以為沈約作

徵吳苞詔

隆昌元年

處士濮陽吳苞栖志穹谷秉操貞固沈情味古白首彌厲徵太學

博士

南齊書吳苞傳

海陵王

王諱昭文字季尚文惠太子第二子永明四年封臨汝公歷濟

陽太守南豫州刺史鬱林卽位封新安王爲揚州刺史以隆昌元年七月卽位改元延興在位四月爲明帝所廢降封海陵王見弒諡曰恭王

卽位詔 延興元年七月

太祖高皇帝英謀光大受命作齊世祖武皇帝宏猷冠世繼暉下武世宗文皇帝清明懿鑠四海宅心並德漏下泉功昭上象聲教所覃無思不洽洪基式固景祚方融而天步多阻運鍾否剝嗣君昏忍暴戾滋多棄侮天經悖滅人紀朝野重足遐邇側視民怨神恫宗祧如綴賴忠謨肅舉香漢廓清俾三后之業絕而更紐七百之慶危而復安猥以冲人入纂乾緒載懷馭朽若陞諸淵思與黎元共綏戩福

南齊書海陵王紀

敕用新安國臣詔

新安國五品以上悉與滿敘自此已下皆聽解遣其欲仕者適其

所樂南齊書海陵王紀

銓用淮關戍將詔延興元年九月

頃者以淮關戍戍勸瘁於行役故單以榮階薄酬厥勞勲狀淹留

未集王府非所以急舍爵之典趣報功之旨便可分遣使部往彼

銓用南齊書海陵王紀

亟婚嫁停徭役詔延興元年十月

周設媒官趣及時之制漢務輕徭在休息之典所以布德弘教寬

俗阜民朕君制八紘志敷九德而習俗之風為弊未改靜言多愠

無忘昏晨督勸婚嫁宜嚴更申明必使禽幣日時標梅息怨正廟

諸役舊出州郡徵吏民以應其數公獲二旬私累數朔又廣陵年

常遞出千人以助淮戍勞擾為煩抑亦苞苴是育今並可長停別

量所出諸縣使村長路都防城直縣為劇尤深亦宜禁斷南齊書海陵王紀

紀

明帝

帝諱鸞字景樞小名玄度始安貞王道生子仕宋歷安吉令遷  
寧朔將軍淮南宣城二郡太守齊文惠遷侍中封西昌侯爲冠  
軍將軍鄧州刺史進號征虜將軍武帝卽位轉度支尙書遷侍  
中歷吳興太守豫州刺史尙書右僕射領衛尉轉左僕射領右  
衛將軍遷侍中尙書令鬱林王卽位加鎮軍將軍進大將軍中  
書監海陵王卽位爲驃騎大將軍錄尙書事揚州刺史封宣城  
郡公加黃鉞都督中外諸軍事太傅封宣城王以延興元年十  
月卽位改元二建武永泰在位五年諡曰明皇帝廟號高宗  
卽位大赦詔建武元年十月

皇齊受終建極握鏡臨宸神武重輝欽明懿鑠七百攸長盤石斯  
固而王度中蹇天階荏阻嗣命多違蕃暨孔棘宏圖景祚將墜諸  
淵宣德皇后遠鑒宗替靈章舊典疇咨台揆允定靈策用集寶命

于予一人，猥以虛薄，繼承大業，仰繫鴻丕，顧臨兆民，永懷先構，若履春冰，寅憂夕惕，罔識攸濟，思與萬國，播此惟新，大赦天下，改元，宿衛身普轉一階，其餘文武賜位二等，通租宿責，換負官物，在建武元年以前，悉原，除劫賊餘口在臺府者，可悉原放，負讎流徙，並還本鄉。

南齊書  
明帝紀

崇儉詔

自今雕文篆刻，歲時光新，可悉停省，蕃牧守宰，或有薦獻，事非任

土，嚴加禁斷。

南齊書  
明帝紀

停息後渚稅詔

頃守職之吏，多違舊典，存私害公，實興民蠹，今商旅稅石頭後渚，及夫鹵借倩，一皆停息，所在凡厥公宜，可卽符斷，主曹詳爲其制。

憲司明加聽察。

南齊書  
明帝紀

銓敘東西二省舊臣詔

日者百司耆齒許以自陳東西二省猶沾微俸辭事私庭榮祿兼

謝興言愛老實有矜懷自縉紳年及可一遵永明七年以前銓敘

之科南齊書

斷土貢詔建武元年十一月

邑宰祿薄俸微不足代耕雖任土恆貢亦為勞費自今悉斷南齊書

紀

滿敘宣城國臣詔

宣城國五品以上悉與滿敘自此以下皆聽解遣其欲仕適所樂

南齊書

達下情詔建武元年十二月

上覽易遺下情難達是以甘棠見美肺石流詠自月一視黃辭如

有含枉不申懷直未舉若蒞民之司並任厥失南齊書

手詔王思遠建武初

文章建武初以疾歸寓居手詔與恩遠

建武二年正月

京師繫囚殊死可降爲五歲刑三署見徒五歲已下悉原赦王公

以下各舉所知隨王公卿士內外羣僚各舉朕違肆心極諫

南齊書

脩理墳壙詔

京師一縣有毀發墳壠隨宜脩理

南齊書  
明帝紀

課農桑詔

食惟民天。義高姬載。蠶實生本。教重軒經。前哲盛範。後王茂則。布令審端。咸必由之。朕肅展巖廊。思引風訓。深務八政。永鑒在勤。靜言日昃。無忘寢興。守宰親民之主。牧伯調俗之司。宜嚴課農桑。固令游惰。撥景肆力。必窮地利。固脩堤防。考校殿最。若耕蠶殊眾。具以名聞。游怠害業。即便列奏。主者詳爲條格。

南齊書  
明帝紀

南齊書  
明帝紀



蠲南徐州三課詔

建武二年三月

南徐州僑舊民丁多充戎旅蠲今年三課

南齊書  
明帝紀

停雍豫等五州稅調詔

雍豫司南兗徐五州遇寇之家悉停今年租調其與虜交通不問

往罪

南齊書  
明帝紀

詠蕭詵詔

建武二年六月

蕭詵擢自凡庸識用輕險因藉倖會早預驅馳永明之季曲頒恩紀鬱林昏悖頗立誠刻寵靈優渥期遇兼隆內總戎機外暢蕃威兄弟榮貴震灼朝野曾不感佩殊荷少吝萬一自以勳高伊霍事均難賞才冠當時恥居物後矯制王權與奪由己空懷疑懼坐構嫌猜覘候宮掖希覬非望蔽上罔下之心誣君不臣之跡固以彰暴民聽喧聒遐邇遂潛散金帛招集不逞交結禁衛互爲聲齒密弄戚邸將肆姦逆朕以其任寄既重爵列河山每加彌縫弘以大

信庶能懷音翻然悛改而豺狼其性凶謀滋甚夫無將必戮陽秋明義況毀積禍盈若斯之大可收付廷尉速正刑書罪止元惡餘無所問

南齊書蕭選傳

贈仇池公楊元秀詔

建武二年七月

仇池公楊元秀氏王苗胤乃心忠勇醜虜凶逼血誠彌厲宣播朝威招誘戎種萬里齊契響然歸從誠効顯著實有可嘉不幸殞喪悽愴於懷夫死事加恩陽秋明義宜追覃榮典以弘勸獎贈仇池公持歸國

南齊書氏羌傳元秀病死符幼孫領其眾高宗詔

下氏王楊馥之詔

建武二年七月

氏王楊馥之世纂忠義率厲部曲樹績邊城克殄姦醜復內稟朝律外撫戎荒款心式昭朕甚嘉之以爲持節督北秦雍二州諸軍事輔國將軍平羌校尉北秦州刺史仇池公沙州刺史楊吳進號安西將軍

南齊書氏羌傳氏楊馥之振義縱據仇池

崇儉詔

建武二年十月

軌世去奢、事殷哲后、訓物以儉、理鏡前王、朕屬流弊之末、襲澆浮之季、雖恭已弘化、刻意隆平、而禮讓未興、侈華猶競、永鑒玄風、兢言集愧、思所以還淳改俗、反古移民、可罷東田、毀興光樓、並詔水衡、量省御乘、南齊書明帝紀

脩晉帝諸陵詔

建武二年十二月

舊國都邑、望之悵然、況乃自經南面、負宸宸居、或功濟當時、德覃一世、而塋壙橫穢、封樹不修、豈直嗟深牧豎、悲甚信陵而已哉、昔中京淪覆、鼎玉東遷、晉元締構、伊始簡文、遺詠在民、而松門夷替、埏路榛蕪、年代殊往、撫事興懷、晉帝諸陵、悉加修理、並增守衛、吳晉陵二郡、失稔之鄉、蠲三調有差、南齊書明帝紀

報江禱詔

建武二年

敷詒厥之訓、送終以儉、立言歸善、益有嘉傷、可從所議、贈散騎常

侍太常諡曰敬子

南齊書江敬傳

詔守長

建武三年正月

申明守長六周之制

南齊書明帝紀

副將士死亡詔

去歲索虜寇邊緣邊諸州郡將士有臨陣及疾病死亡者並送還

本土

南齊書明帝紀

車府詔

建武三年三月

車府乘輿有金銀飾校者皆剔除

南齊書明帝紀

停光新詔

建武三年閏十二月

今歲不須光新可以見錢為百官供給

南齊書明帝紀

誅王晏詔

建武四年正月壬寅

晏問閭凡伍少無特操階緣人乏班齒官途世祖在蕃搜揚擢用棄略疵瑕遂升要重而輕跳險銳在貴彌著猜忌反覆觸情多端

故以兩宮所弗容、十手所共指、既內愧於心、外懼憲牘、掩迹陳廡、多厯年載、頻授蕃任、輒辭請不行、事似謙虛、情實諛伏、隆昌以來、運集艱難、匡贊之功、頗有心力、迺爵冠通侯、位登元輔、綢繆恩寄、朝莫均焉、谿壑可盈、無厭將及、視天畫地、遂懷異圖、廣求卜相、取信巫覡、論薦黨附、遍滿臺府、令太息德元、淵數亡命、同惡相濟、劍客成羣、弟誦凶惡、遠相脣齒、信驛往來、密通要契、去歲之初、奉朝鮮于文祭、備告姦謀、朕以信必由中、義無與貳、推誠委任、覲能悛改、而長惡易流、構扇煽大、與北中郎司馬蕭毅、臺隊主劉明達等、尅期竊發、以河東王鉞、識用微弱、可爲其主、得志之日、當守以虛器、明達諸辭、炳然具存、昔漢后以反脅致討、魏臣以糾髮爲戮、況無君之心、旣收陵上之迹、斯著此而可容、誰置刑辟、並可收付廷尉、肅明國典、

南齊書

丁晏傳

興學詔

建武四年正月庚午

嘉役停俎定方旨於必甘良玉在攻表珪璋於既就  
是呂陶鈞萬品務本為先經緯九區學敦為大往因時康  
崇建庠序屯虞荐有權從省廢誦誦寂寥倏移年稔永言  
古昔無忘旰昃今華夏又安要荒慕嚮締修東序寔允適  
時便可式依舊章廣延國胄弘敷景業光被後昆

南齊書  
明帝紀

下謝朓詔

建武四年

夫昭然榮觀風流自遠蹈彼幽人英華罕值故長揖楚相見稱南  
國高謝漢臣取貴良史新除侍中中書令朓早藉羽儀夙標清尚  
登朝樹績出守馳聲遂斂跡康衢拂衣林池抱箕穎之餘芳甘願  
賴而無悶撫事懷人載畱欽想宜加優禮用旌素槩可賜牀帳褥  
席俸已卿祿常出在所

梁書謝朓傳朓為吳興太守建武四年詔  
徵為侍中中書令抗表不應築室郡之西

報明帝

下詔

報芮芮王求醫工等物詔

建武中

知須醫及織成錦工指南車漏刻並非所愛南方治疾與北土不同織成錦工並女人不堪涉遠指南車漏刻此雖有其器工匠久不復存不副爲悞

南齊書  
齊書傳

遣陳顯達北討詔

永泰元年正月

晉氏中微宋德將謝蕃臣外叛要荒內侮天未悔禍左衽亂華巢穴神州逆移年載朕嗣膺景業踵武前王靜言隆替思又區夏但多難甫夷恩化肇洽興師擾眾非政所先用戡遠圖權緩北略冀戎夷知義懷我好音而凶醜剽狡專事侵掠驅扇異類蟻聚西偏乘彼自來之資撫其天亡之會軍無再駕民不重勞傳檄以定三秦一麾而臣禹迹在此舉矣且中原士庶久望皇威乞師請援結軌馳道信不可失時豈終朝宜分命方嶽因茲大號侍中太尉顯達可暫輟槐陰指授羣帥中外纂嚴

南齊書陳  
顯達傳

復孔子祭秩詔

永泰元年三月

紫齋書  
闕作闕

仲尼明聖在躬，允光上哲，弘厥雅道，大訓生民。師範百王，軌儀千載。立人斯仰，忠孝攸出。立功潛被，至德彌聞。雖反袂遐曠，而桃薦靡關。時祭舊品，秩比諸侯。頃歲已來，祀典陵替。俎豆寂寥，牲饗莫舉。豈所以克昭盛烈，永降風教者哉！可式循舊典，詳復祭秩，使牢餼備禮，欽饗兼申。

南齊書  
明帝紀

罪王敬則詔

永泰元年五月

謝朓啟事騰徐嶽列如右。王敬則稟質凶猾，本謝人綱，直以宋季多艱，頗有膂力之用。驅獎所至，遂升榮顯。皇運肇基，預聞末議。功非匡國，賞實震主。爵冠報珪，身登衣袞。固已風雅作刺，播紳側目。而溪谷易盈，鵠臯難改。猜心內駭，隍解外布。永明之朝，履霜有漸。隆昌之世，堅冰將著。從容附會，朕有力焉。及景厯惟新，推誠盡禮。中使相望，軒冕成陰。迺嫌跡愈興，禍圖茲構。收合亡命，結黨聚羣。外候邊警，內伺國隙。元遷兄弟，中萃淵岐。姦契潛通，將謀竊發。朓



卽姻家嶽又邑子取據匪他昭然以信方邵之美未聞韓彭之讐  
已積此而可容孰寄刑典便可卽遣收掩肅明國憲大辟所加其  
父子而已凡諸註誤一從蕩滌南齊書王敬則傳案是年七月遭詔編入沈約集中  
敕賜傅昭漆合燭盤

卿有古人之風故賜卿古人之物南史傅昭傳

東晉侯

侯諱寶卷字智藏本名明賢明帝第二子建武元年立爲皇太  
子永泰元年七月卽位明年改元永元在位三年見弑追封東  
昏侯

優詔免議陳顯達永元元年四月

昔衛霍出塞往往無功馮鄴入關有時虧喪况公規模蕭舉期寄  
兼深見可知難無損威略方振遠圖廓清朔土雖執憲有常非所

得議南齊書陳顯達傳

詠謝朓詔 永元元年

公等啟事如此。朓資性輕險。久彰物議。直以彰顯。薄伎。見齒衣冠。昔在洛宮。構扇藩邸。日夜從諛。仰窺俯畫。及還京師。謝自宣露。江漢無波。以為己功。素論於茲。而盡摺紳。所以側目。去夏之事。頗有微誠。實擢曲加。踰邁倫序。感悅未聞。陵競彌著。遂復矯構風塵。妄惑朱紫。詆貶朝政。疑間親賢。巧言利口。見醜前志。消流織業。作戒遠圖。宜有少正之刑。已中。去害之義。便可收付廷尉。肅明國典。前齊書謝朓傳

徐孝嗣賜死下詔 永元元年十月

周德方熙。三監迷叛。漢祚載昌。宰臣構戾。皆身膏斧鉞。族同煙燼。殷鑒上代。垂戒後昆。徐孝嗣憑藉世資。早蒙殊遇。階緣際會。遂登台鉉。匡翼之誠。無聞。詔黜之迹。屢著。沈文季門世。下缺 南齊書徐孝嗣傳

和帝

帝諱竇融字智昭明帝第八子建武元年封隨郡王永元元年改封南康王出爲西中郎將荊州刺史二年長史蕭穎胄雍州刺史蕭衍舉兵三年擁立于江陵改元中興在位二年禪位于梁封巴陵王尋薨追諡曰和帝

舉義下教

吾躬率晉陽翦此凶孽戎事方勦宜覃澤惠所領內繫因見徒罪無輕重殊死已下皆原遣先有位署卽復本職將吏轉一階從征身有家口停鎮給廩食凡諸雜役見在諸軍帶甲之身克定之後悉免爲民其功效賞報別有科條

南齊書  
和帝紀

復除荆雍義罷詔

中興元年四月

荆雍義舉所某實始王迹君子勞心細人盡力宜加酬獎副其乃誠凡東討罷軍及諸嚮義之眾可普復除

南齊書  
和帝紀

詔報崔儼

中興元年

具卿寬切之懷卿門首義而旃德木彰亦追以慨然今當顯加贈諡南齊書崔

意景傳

賜進士出身二品銜廣東等處提刑按察使司按察使兼管驛傳事務山岡王城藻校刊

全齊文卷五終

全齊文卷六

烏程嚴可均校輯

文安王后

后諱寶明琅邪臨沂人宋吳興太守韶之孫女泰始末高帝爲  
文惠太子納爲室建元元年爲南郡王妃四年爲皇太子妃永  
明十一年爲皇太孫太妃鬱林卽位尊爲皇太后冊宣德宮歷  
鬱林至和帝廢立大事咸假其命天監十一年薨年五十八謚  
曰安后

廢少帝爲鬱林王令

鎮軍車騎左僕射前將軍領軍左衛衛尉八座自我皇厯啟基受  
終于宋睿聖繼軌三業重光太祖以神武創業草昧區夏武皇以  
英明提極經緯天人文帝以上哲之資體元良之重雖功未被物  
而德已在民三靈之眷方永七百之基已固嗣主特鍾沴氣爰表

全齊文卷六

弱齡險戾著於綠車。愚固彰於宗正。狗馬是好。酒色方湎。所務唯鄙事。所疾唯善人。世祖慈愛曲深。每加容掩。冀年志稍改。立守神器。自入纂鴻業。長惡滋甚。居喪無一日之哀。縗絰爲歡宴之服。昏酣長夜。萬機斯壅。發號施令。莫知所從。閹豎徐龍駒。專總樞密。奉叔珍之。互執權柄。自以爲任得其人。表裏緝穆。適蕭曹而愈信。布倚太山而坐平原。於是恣情肆意。固顧天顯。二帝姬嬪。並充寵御。兩宮遺服。皆納玩府。內外混漫。男女無別。丹屏之北。爲酤鬻之所。青蒲之上。開桑中之肆。又微服潛行。信次忘反。端委以朝。虛位交戟而守空宮。積旬矣。宰輔忠賢。盡誠奉主。誅鋤羣小。冀能懷革。曾無克己。更深怨憾。公卿股肱。以異己置戮。文武昭穆。以德譽見猜。放肆醜言。將行屠脍。社稷危殆。有過綴旒。昔太宗克光於漢世。簡文代興於晉氏。前事之不忘。後入之師也。鎮軍居正。體道家國。是賴伊霍之舉。實寄淵謨。便可詳依舊典。以禮廢黜。中軍將軍析安。

王體自文皇帝嘗天秀宜入嗣鴻業永寧四海外郎以禮奉迎未  
亡人屬此多難投筆增慨

南齊書  
林王紀

廢少帝為海陵王令

司空後將軍丹陽尹右僕射中領軍八座夫明晦迭來屯平代有  
上靈所以眷命億兆所以歸懷自皇家消耀列聖繼軌諸侯官方  
百神受職而殷憂時啟多難荐臻隆昌失德特紊人鬼非徒四海  
解體乃亦九鼎將移賴天縱英輔大匡社稷崩基重造墜典再興  
嗣主幼沖庶政多昧且早嬰疴疾弗克負荷所以宗正內侮或藩  
外叛覘天視地人各有心雖三祖之德在民而七廟之危行及自  
非樹以長君鎮以淵器未允天人之望寧息奸究之謀太傅宣城  
王肩體宣皇鍾慈太祖識冠生民功高造物符表夙著謳誦有在  
宜入承寶命式寧宗祏帝可降封海陵王吾當歸老別館昔宣帝  
中興漢室簡文重延晉祀庶我鴻基於茲永固言念家國感慶載

全齊文卷六

卷六

二

懷陵王紀

數東昏侯罪惡令

皇室受終，祖宗齊聖。太祖高皇帝肇基駿命，膺祿受圖。世祖武皇帝係明下武，高宗明皇帝重隆景業，咸降年不永，宮車係晏。皇祚之重，允屬儲元，而稟質凶愚，發於稚齒，爰自保姆，迄至成童，忍戾昏頑，觸途必著。高宗畱心正嫡，立嫡惟長，輔以羣才，閑以賢戚，內外維持，冀免多難。未及薨稔，便逞屠戮，密戚近親，元勳良輔，覆族殲門，旬月相繫。凡所任杖，盡慝窮奸，皆營伍屠販，容狀險醜，身秉朝權，手斷國命，誅戮無辜，納其財產，睚眦之間，屠戮比屋，身居元首，好是賤事，危冠短服，坐臥以之，晨出夜反，無復已極。驅斥氓庶，巷無居人，老細奔迫，置身無所。東過西屏，北出南驅，負疾輿屍，填街塞陌，輿築繕造，日夜不窮。晨構夕毀，朝穿基塞，絡以隋珠，方斯已陋，飾以壁璫，曾何足道。時暑赫曦，流金鑠石，移竹藝果，匪日伊



夜恨未及補業已先枯。罄鉅紛紜。勤倦無已。散費國儲。專事浮飾。逼奪民財。自近及遠。兆庶恒恒。流竄道路。府帑既竭。肆奪市道。工商裨販。行號道泣。屈此萬乘。躬事角抵。昂首翹肩。逞能植木。觀者如堵。曾無忤容。芳樂華林。並立闌闌。踞肆鼓刀。手於輕重。干戈鼓譟。昏曉靡息。無戎而城。豈足云譬。至於居喪淫譙之愆。三年載弄之醜。反道違常之釁。牝雞晨鳴之慝。於事已細。故可得而略也。罄楚越之竹。未足以言。校辛癸之君。豈或能匹。征東將軍忠武奮發。投袂萬里。光奉明聖。翊成中興。乘勝席卷。掃清京邑。而羣小靡識。嬰城自固。緩戮稽誅。倏彌旬月。宜速勘定。寧我邦家。可潛遣閹介。密宣此旨。忠勇齊奮。端加蕩撲。放斤昏凶。衛送外第。未亡人不幸。驟此百罹。感念存沒。心焉如割。奈何奈何。而齊書東晉侯覽

迎立南康王令

西中郎將南康王宜纂承皇祚。光臨億兆。方俟清宮。未卽大號。可

且封宣城南琅邪南東海東陽臨海新安尋陽南郡竟陵宜都十  
郡爲宣城王相國荊州牧加黃鉞置僚屬選百官西中郎府南康  
國並如故須軍次近路主者詳依舊典法駕奉迎

南齊書和帝紀  
驍騎將軍夏侯

宣自京師至江陵  
稱宣德太后令

曰巴陵王寶義爲太尉領司徒令

不言之化形于自遠

南齊書明七王  
傳南史四十四

豫章王疑

疑字宣儼小名阿玉高帝第二子宋泰始中爲太學博士長城  
令入爲尚書左民郎錢唐令賜爵晉壽縣侯除通直散騎侍郎  
元徽初爲監朔將軍遷中書郎出爲安遠護軍武陵內史遷順  
帝車騎諮議參軍隨府遷驍騎從事中郎及卽位轉侍中加冠  
軍將軍遷中領軍加散騎常侍出爲左將軍江州刺史改封永  
安縣公徙鎮西將軍荊州刺史齊受禪遷侍中尚書令驍騎大

將軍開府儀同三司揚州刺史封豫章郡王徙南蠻校尉荆湘  
二州刺史入爲中書監司空揚州刺史武帝卽位進太尉領太  
子太傅進大司馬永明十年卒贈丞相揚州牧諡曰文獻王  
請立州郡秩俸供給定格表

宋氏以來郡州秩俸及雜供給多隨土所出無有定準夫

己上二字

通典有之本  
傳在敘事中

循革貴宜損益資用治在夙均政由一典伏尋郡縣

長尉俸祿之制雖有定科而其餘資給復由風俗東北異源西南  
各緒習以爲常因而弗變緩之則莫非通規澄之則靡不入罪殊  
非約法明章先令後刑之謂也臣謂宜使所在各條公用公田秩  
石迎送舊典之外守宰相承有何供調尙書精加洗覈務令優衷  
事在可通隨宜開許損公侵民一皆止卻明立定格班下四方永  
爲恒制

南齊書豫章王嶷  
傳又見通典五

讓領太子太傅手啟

陛下已敘孝纂業萬寓惟新諸弟有序臣屢荷隆愛叨授台首不敢固辭俛仰祇寵心魂如失負重量力古今同規臣窮生如浮質操空素任居鼎右已移氣序自頃以來宿疾稍纏心慮恍惚表於容狀視此根候常恐命不勝恩加以星緯屢見災祥雖脩短有恆能不耿介比心欲從俗啟解今職但厝辭爲鄙或貽物誚所以息意緘嘿一委時運而可復加寵榮增其顛墜且儲傳之重實非恆選遂使太子見臣必束帶宮臣皆再拜二三之宜何以當此陛下同生十餘今惟臣而已友于之愛豈常獨臣鍾其隆遇別奉啟事仰祈恩照臣近亦侍言太子告意子良具因王儉申敘未知粗上聞未福慶方隆國祚永始若天假臣年得預人位唯當請降韶瑞以飾微軀永侍天顏以惟畢世此臣之願也服之不衷猶爲身災況寵爵乎殊榮厚恩必誓以命請

南齊書陳  
章王叔陵傳

自陳啟

臣自還朝便省儀刀提刀左右十餘亦省唯郊外遠行或後暫有入殿亦省服身今所牽仗二使轂二白直共七八十人事無大小臣必欲上啟伏度聖心脫未委曲或有言其多少不附事實仰希卽賜垂敕

南齊書齊章王曄傳

又啟

揚州刺史舊有六白領合扇二百拂臣脫以爲疑不審此當云何行園苑中乘輦出籬門外乘輦鳴角皆相仍如此非止於帶神州者未審此當云何方有行來不可失喪

南齊書齊章王曄傳

又啟

臣拙知自處闇於疑訪常見素姓扶詔或箸布屣不意爲異臣在西朝拜王儀飾悉依宋武陵事例有二鄣扇仍此下都脫不爲疑小兒奴子並青布袴衫臣齋中亦有一人意謂外庶所服不疑與羊車相類曲荷慈旨今悉改易臣昔在邊鎮不無羽衛自歸朝以

來便相分遣。俠穀白直格置三百許人。臣頃所引不過一百。常謂京師諸王。不煩牽仗。若郊外遠行。此所不論。有仗者非臣一人。所以不容方幅敬省。又因王儉備宣下情。臣出入榮顯。禮容優泰。第宇華曠。事乖素約。雖宋之遺製。恩處有在。猶深非服之慙。威衛之請。仰希曲照。南齊書豫章王嶷傳

又啟

違遠侍宴。將踰一紀。憂苦間之。始得開顏。近頻侍坐。不勝悲喜。沾飲過量。實得仰示恩狎。令白下知見。以杜游塵。陛下畱恩子弟。此情何異。外物政自彊生間節。聲其厚薄。伏度或未上簡。臣前在東田。承恩過醉。實思歎往秋之誨。故言啟至切。亦令羣物聞之。伏願已照此心。前侍幸諱。梁文帝宅。臣依常乘車至仗後。監伺不能示。臣可否。便互競啟聞。云臣車逼突黃屋。麾旄如欲相中。推此用意。亦何容易。仰賴慈明。卽賜垂救。不爾臣終不知闔貽此累。比日禁

斷整密。此自常理。外弊乃云起。臣在華林。輒捉御刀。因此更嚴度。情推理。必不容爾。爲復上。敕知耳。但風塵易至。和會實難。伏願猶憶。臣石頭所敕。無生間縫。比閑侍。無次略。附茹亮口宣。臣由來華素。已具上簡。每欲存衷。意慮不周。或有乖常。且臣五十之年。爲翫幾時。爲此亦復不能以理。內自制。北第舊邸。本自甚華。臣改脩正而已。小小製置。已自仰簡。往歲收合。得少雜材。並蒙賜故板。敝榮內。許作小眠齋。始欲成就。皆補接爲辨。無乖格製。要是懼柏之華。一時新淨。東府又有齋。亦爲華屋。而臣頓有二處住止。下情竊所未安。訊訪東宮玄圃。乃有柏屋。製甚古拙。內中無此齋。臣乃欲壞取。以奉太子。非但失之於前。且補接既多。不可見移。亦恐外物或爲異論。不審可有垂許。送東府齋理否。臣公家住止。率爾可安。臣之今敕。實無意識。亦無言者。太子亦不知。臣有此屋。政以東宮無而。臣自處之。體不宜爾。爾所敕蒙允。臣便當取臣第屋安之。不疑。

陛下若不照體臣心，便當永廢不脩。臣自謂今啟，非但是自處宜然，實爲微臣往事，伏願必垂降許。伏見以諸王舉貨，屢降嚴旨，少拙營生，已應上簡。府州郡邸舍，非臣私有。今巨細所資，皆是公閭。臣私累不少，未知將來罷州之後，或當不能不試學營覓。已自贖連年惡疾，餘顧影單回，無事畜聚，唯逐手爲樂耳。

南齊書像  
章王嶷傳

唐寓之賊起啟

此段小寇出於兇愚，天網宏罩，理不足論。但聖明御世，幸可不爾。比藉聲聽，皆云有由而然，豈得不仰啟所懷。少陳心款，山海崇深，臣獲保安樂，公私情願於此可見。齊有天下，歲月未久，澤沾萬民，其實未多。百姓恃險，懷惡者眾。陛下曲垂流愛，每存優旨，但頃小大士庶，每以小利奉公，不顧所損者大。撻箠檢工巧，督餉簡小塘，藏丁匿口，凡諸條制，實長怨府。此目前交利，非天下大計。一室之中，尚不可精，而甫之內，何可周。祖公家何嘗不知民多欺巧，古今



政以不可細碎故不爲耳爲此者實非乖理但議理者百不有一  
陛下弟兄大臣猶不皆能伏理況復天下悠悠萬品怨積聚黨兇  
迷相類止於一處何足不除脫復多所便成紆紆久欲上啟閑侍  
無因謹陳愚管伏願特畱神恩南齊書豫章王嶷傳南史四十二  
疾篤啟

臣自嬰今患亟降天臨醫走術官泉開藏府慈寵優渥備極人臣  
生年疾迫遽陰無幾願陛下審賢與善極壽蒼身彊德納和爲億  
兆御臣命違昌數在奪恩憐長辭明世伏涕鳴咽南齊書豫章王嶷傳  
與沙州刺史楊廣香書

夫廢興無謬逆順有恆古今共貫賢愚同察梁州刺史范柏年懷  
掖詭態首鼠兩端既已被伐盤桓稽命遂潛遣李烏奴叛楊文弘  
扇誘邊疆荒雜柏年今已梟禽烏奴頻被摧破計其餘燼行自消  
夷今遣參軍行晉壽太守王道寶參軍行北巴西新巴二郡太

守任湜之行宕渠太守王安會領銳卒三千、過塗風邁、浮川電掩、  
又命輔國將軍三巴校尉明惠照、巴郡太守魯休烈、南巴西太守  
柳弘稱、益州刺史傅珍、並簡徒競騫、選甲爭馳、雍州水步、行次魏  
興、並山東僑舊、會於南鄭、或汎舟墊江、或飛旂紆道、腹背颯騰、表  
裏震擊、文弘容納叛戾、專爲淵藪、外侮皇威、內凌國族、君奕世忠  
款、深識理順、想卽起義、應接大軍、共爲犄角、討滅烏奴、克建忠勤、  
茂立誠節、沈攸之資十年之積、權百旅之眾、師出境而城潰、兵未  
戰而自屠、朝廷無遣餼之費、士民靡傷痍之弊、况蕞爾小豎、方之  
蔑如、其取殲殄、豈延漏刻、忝以寡昧、分陝司蕃、清氛蕩穢、諒惟任  
職、此府器械山積、戈旗林聳、士卒剽勁、蓄銳積威、除難勦寇、豈俟  
召集、但以翦伐萌蒨、弗勞洪斧、撲彼蚊蚋、無假多力、皇上聖哲應  
期、恩澤廣被、罪止首惡、餘無所問、賞罰之科、具寫如別、南齊書  
氏羌傳

戒諸子

凡富貴少不驕奢以約失之者鮮矣漢世以來侯王子弟以驕恣之故大者滅身喪族小者削奪邑地可不戒哉

南史四十二

遺令

人生在世本自非常吾年已老前路幾何居今之地非心期所及性不貪聚自幼所懷政以汝兄弟累多損吾暮志耳吾亡後當共相勉厲篤睦爲先才有優劣位有通塞運有富貧此自然理無足以相陵侮若天道有靈汝等自各脩立灼然之分無失也勤學行守基業治閨庭尚閑素如此足無憂患聖主儲皇及諸親賢亦當不以吾破易情也三日施靈唯香火槃水孟飯酒脯賓擲而已朔望菜食一盤加以甘果此外悉省葬後除靈可施吾常所乘輦扇繖朔望時節席地香火槃水酒脯孟飯賓擲便足雖才愧古人意懷粗亦有在不以遺財爲累主衣所餘小弟未婚諸妹未嫁凡應此用本自茫然當稱力及時率有爲辦事事甚多不復甲乙棺器

及墓中勿用餘物爲後患也朝服之外唯下鐵鍔刀一口作冢勿令深一一依格莫過度也後堂樓可安佛供養外國二僧餘皆如舊與汝游戲後堂船乘吾所乘牛馬送二宮及司徒服飾衣裘悉爲功德南齊書豫章王嶷傳臨終召子子廉子格云云子廉等號泣奉行

江夏王鋒

鋒字宣穎小名閭黎高帝第十三子

南史作十二子

建元三年封江夏

王永明中歷輔國將軍南彭城平昌二郡太守散騎常侍左衛將軍轉侍中領石頭戍事出爲南徐州刺史鬱林卽位加散騎常侍隆昌初入爲侍中領驍騎將軍加祕書監延興元年爲明帝所殺

修柏賦

既殊羣而抗立亦含貞而挺正豈春日之自芳在霜下而爲盛衝風不能摧其枝積雪不能改其性雖坎壈於當年庶後凋之可詠

南史江夏

王鋒傳

始安王遙光

遙光字元暉高帝兄子襲父道生爵始安王歷員外郎轉給事黃門郎太孫洗馬轉中書郎明帝卽位以爲前將軍揚州刺史進撫軍將軍加散騎常侍進大將軍東昏奉遺詔加侍中中書令永元元年據東府反伏誅

上明帝表薦王陳王僧孺

臣聞求賢暫勞垂拱永逸方之疏壤取類導川伏唯陛下道隱旒纁信充符璽白駒空谷振鷺在庭猶懼隱鱗卜祝藏器屠保物色關下委裘河上非求製於一狐諒求味於兼采而五聲倦響九工是詢寢議廟堂借聽與阜臣位任隆重義兼邦家賢欲使名實不違微幸路絕勢門上品猶當格以清談英俊下僚不可限以位貌竊見祕書丞琅邪王陳年二十一七葉重光海內冠冕神情氣茂

允迪中和叔寶理遣之談彥輔名教之樂故以暉映先達領袖後進居無塵雜家有賜書辭賦清新屬言玄遠室邇人曠物疎道親養素上園台階虛位庠序公朝萬夫傾首豈徒苟令可想李公不亡而已哉乃東序之祕寶璫璫之茂器前侯官令東海王僧孺年三十五理尙虛約思致悟敏既筆耕爲養亦傭書成學至乃照螢映雪編蒲緝柳先言往行人物雅俗甘泉遺儀南宮故事畫地成圖抵掌可述豈直鼷鼠有必對之辨竹書無落簡之謬訪對不休質疑斯在

梁書王陳傳  
王僧孺傳

誅謝朓啟

謝朓資性險薄大彰遠近王敬則往構凶逆微有誠効自爾昇擢超越倫伍而谿壑無厭著於觸事比遂扇動內外處處姦說妄貶乘輿竊論官禁間誦親賢輕議朝宰醜言異計非可具聞無君之心既著共棄之誅宜及臣等參議宜下北里肅正刑書

南齊書謝朓傳東昏

失德江祚欲立始安王遙光遙光密致意於朏朏懼見引卽以朝等謀告左典盛祚間以告遙光遙光大怒乃稱敕召朏付廷尉與徐孝嗣師暄等連名殺朏朏

### 文惠太子

太子諱長懋字雲喬武帝長子小字白澤昇明初爲輔國將軍遷晉熙王撫軍主簿轉祕書丞不就除中書郎遷黃門侍郎出爲左中郎將監蠻校尉雍州刺史齊受禪封南郡王進號征虜將軍徵爲侍中中軍將軍移鎮西州遷征北將軍南徐州刺史武帝卽位立爲皇太子永明十一年薨諡曰文惠葬景安陵鬱林卽位追尊爲文帝廟稱世宗有集十一卷

### 疾篤上表

臣地屬元良業微三善光道樹風於焉蓋闕晨宵惴懼有若臨淵攝生外和構離痼疾大漸惟幾顧陰待謝守器難永視膳長違仰戀慈顏內懷感哽竊爲死生定分理不足悲伏願割無已之悼損

既往之傷寶衛聖躬同休七百臣雖沒九泉無所遺恨

南齊書文惠太子傳

賜進士出身二品銜廣東等處提刑按察使司按察使兼管驛傳事務黃岡王毓藻校刊

全齊文卷六終